

SOOKOHA NI SOOWAAKHULA

AHEPERI MPANTTE I

♪ Vaaweryaneyaya sayi owo wira voohikhala Muluku?
Eyo yaarowa okhala y'ekekhaixa, khiyaarowa?
Khivaaweryaneyaya wiiriwa ehikhanle Apwiya.

Nkinrowa olaleya sothene iyo. Masi koonaa wira kaamukumanana etthu yoowiixeryaxa, moosuwela, tivo vanreerela miyo kiilikanyihe. Masi, oh, saari sooyeva, saana. Vano alakela khasikhanle sookoha sinci-ene eriyari y'atthu nto, ti sookoha sookhweyaxa ni sooveya. Ahe, kinnitteeliwa murima ophavelaka waakhula vooreeraxa sinwery'aka, ni mukhaliheryo w'Apwiya.

² Nto vakhala wira Munna Arganbright muthiyana ori vaava ohiy'ula . . . Munna Ruth. Nyuwo muri vaava, Munna Ruth? Nno. Miyo kihana e . . . Oh, ayo, miyo kooruuha opuro aya va, ni . . . Nnari, nkiruuuhale. Ahe, kinoowerya okhalana va. Kaahikalana muxahukhuni mwaka, nto koomuhiya xahukhu aka owaani. Vano, mupiliisa akivara kirowaka owaani, Munna Fleeman, murwe mukoopole. Mmuleele Billy wira . . . kiroomuhiya xahukhu aka owaani, kineettiha kihirina ettikitti yo weettihano ohiy'ula. Nto koonaa wira kaahikalana mpoolosani mwaka; kinoomalaru waakakhanya ikuwo. Kirwiye kitthimakaka, oxekuwa ola, kaathikila malaxi kaakuvaka nto kaahaana ohiya ni waakuva wira kiphiye m'okathi va, waakakhanya ikuwo otthimakela nno. Ni miyo—miyo kooruuha eliivuru yo otaphulela moolumo, masi nyuwo munooowerya okhalana iwe.

³ Muhiisoone voonanara mwaha wa ewarakha *eyo*. Kaahaakheleru emosa yootepa ovikana *eyo*, *eyo* enrowa okhala ewarakha yooreera. Eyo yaari yooreera. Eyo yaari saana, yooreera saana. Miyo kaahoolelani wira nkaarowa osoma, masi kisoma, moosuwela, ni nkaawerya-tho ovilela. Miyo kaaththuna osuwela paahi ele nyuwo mwaahimyaanyu. Ni yaari saana, yooreera saana, aalempe ntoko musomiha a oxikola vaathuneyaaya olepa. Eyo yaari yooreera, ni miyo ennikisivel. Ni *eyo*—*eyo* ennoovahani . . .

⁴ Moone, okisivela iwarakha sa mutthu aarowa—aarowa ovirikana vakhani ni nyuwo. Moone, nyuwo mwaairaaniwaka okathi wothene, ohikhala onoovirikanyani, nyuwo munkhala oohivareliwa mutteko. Muhaana okhalana mutthu onvirikanyana ni nyuwo vakhani wira musuweleke saana ni otthikela mphavelaka. Ni—ni munookhala oottiyeya mwaahiwehe vale; vano nyuwo—vano munimwiikelihha mmukacamihoni mwairaru

yeeyo. Muhaana okelela ohoo ni imaara kamosa-kamosa onimoorwa mutthu onvirikanyana ni nyuwo ni otatha mapururu anyu.

⁵ wAfrika kaahaaphwanya amwatto aili axikhaani, n'awo yaari axikhaani, oowuunnuwa ntoko *so*. Mwatto, mwaamukhaani, a malepa; mwatto mwaamukhaani, mwatto mwaamukhaani oothiyana. Nto vano, awo yaakhalasa ntoko apaakha axikhaani, awo yaari axikhaani siiso, axikhaani... itthu sikhaani sooreeraxxa, awo yaamuthweelasa. Nto miyo kaarowa waattikiheryasa wAmerika, miyo kaahaakuxa mukayelani ya axipalame. Kaarowa waattikiha, masi nkaawerya ophwanya hata—hata ethhu wira kaapophe, hata mwaapomphe. Ni nkaatthuniherwa waaruuhu Estadu Unidu awo ehipomphe we toko, ni nkaawerya ophwanya wAfrika wothene. Masi mwaatthunneru osuwela sinto aari mwatto wala mnari, waari ommana vakhani ottuli. Owo aamwiikhaliherya vakhani wira oosuveliheni wira aari mwatto, tivo—tivo yaanoosuvelihani ele owo aaryaaawe.

⁶ Ti siiso murin'anyu wira imaara kamosa-kamosa, moosuwela, woolowiha mapururu ottuli, wira musuweliwe mw'ani. Masi, vano, hiyo khaninnanariwa ntoko mwatto; hiyo paahi—hiyo onisivela eyo, wira... atthu okoha sookoha. Nto sookoha ntoko seijo, Munna Ruth, ti yooreera, saana wa miyo. Eyo e... Miyo—miyo okisivela eyo, moone. Ti itthu iye sikhanle soophweeliha sinkinanara waakhela. Masi iyo ti... ele yaari yooreera.

⁷ Vano nookhalana sookoha, kamosa-kamosa sooreera, soophaveleya. Ookhala mulaleyi mmosa ottuli iwe musaala y'ottuli onoomalaru, okikoha, khwira, "Maprefeta aili a Wisuupulula 11, awo yaarowa orwa ohinathhi wiiraneya Okuxiwa? Wala ohinathhi okuxiwa Isarayeli? Nto exenee..." Vano, iyo ti inamuna sa sookoha si—si—sinoovitikanyani. Masi sookoha iya sookhweya ntoko ela ti vooreera.

Masi vano, nihinatthi opacerya, nrowe nuuramihe muru ahu wira nivekele.

⁸ Tithi, noosuwela wira okathi Nyuwo mwaarinaanyu iyaakha muloko ni piili, Nyuwo mwaaphwanyiwe Mpaani moolompa ni awiixuttihi a ikano ni asuweli, nvaanyihanaka ni yaawo Soolempwa. Nto awo yaari—awo yaanixankela mu... atthu a khalayi, ni owiixuttihiwa saana mwa Soolempwa, ni omoona Mmiravo mwaamukhaani a iyaakha soophiyaka muloko ni piili aawerya—aawerya waavirikanya, mwa olakiherya Soolempwa. Nyuwo mwaari mwaha wa muteko w'Atithi Anyu. Nyuwo mwaahaaleela ame Anyu, "Khamunsuwela wira kihaana okhala mmutekoni mw'Atithi Aka?" wira kitaphulele Soolempwa ni soohimya saya sa erooho.

⁹ Nto vano hiyo ninnivekela, Pwiya, wira—wira Nyuwo musuwelaka moota hiyo nryaahu ootteettheya ni oolosowa, ni moota nryaahu oomorela mwa soovonya, Nyuwo murwe ni hiyo ohiy'ula mwa mukhalelo wa Erooho Yoowaarya, ni munitaphulele Soolempwa hiyo. Miyo kinwehererya ni kinlipa ni Nyuwo. Nto miyo kakhalakhala, okathi p'ukathi, kiphavelaka ohela miyuupuwelo saka wala otaphulela wala etthu p'itthu yo wiikuxererya, ophavela okhaliha wira yiiweye mwa enamuna kaaleeliheryaaka wira yaamukhala saana, mutthuke eyano aka, Pwiya, ntoko Nyuwo mwaarow'anyu... Nyuwo mwaawiirinhe-anyu amwatto, okathi yaamurwenlyaaya Daniyeli. Nyuwo nlelo mwa Muluku mmosaru.

¹⁰ Ni mutthuniherye wira ekhale yothene... Okhala wira hiyo ninlipa ni Erooho Yoowaarya, Eyo enuupululele itthu iya. Vano nto okathi Eyo enlavulaaya seijo, ekhalihe yoowooneyaxa wira ole okonhe yookoha owerye waakhela Yeeyo. Ni Eyo yaakhula voovirkana ni ele kweekwe enaamini aka, vano muhakalalihe murima aka, Pwiya, osuwela wira koophwanya etthu esya, ni enamuna emosa yooreera y'Apwiya. Maana Nyuwo muhimmye wira, "Mwaavaavye Soolempwa, maana mwa Seiyo nyuwo munuupuwela okhalana Ekumi Ehinala, ni ti Seiyo sinkikhalela Miyo onamoona."

¹¹ Vano, numala wiixuttiha nno wa Soolempwa, vekeekhai saamukhumeleta miyuupuwelo sinci-ene ni sikina. Nto miyo kinvekela, Muluku, vano wira sookoha iya sothene sikhale sookohiwa ntoko voosivela ni vooreera murima, Erooho Yoowaarya yaakhule voosivela ni vooreera murima. Vano hiyo ninvekela mwa Nsina na Yesu, ni wa ovuwa wa Muluku, ni olipihiwa wa Ekereja Awe. Amen.

¹² Sookhala imaara sinci-ene soothuna sowiisoona wa etthu, sinihononaaya osiva wa etthu yothene. Nto vano, sookoha mwaha wa Yoolempwa ela sookohiwa.

¹³ Vano, kooparu muturi vakhani ohiy'ula, kirookumiha niino nimosa noopakiwa. Nto kawararu, nkinwerya olaleya, kinoopisa kaalaleyaka; kakumiha, nto kinihalela woopa muturi.

¹⁴ Muhanu Billy Graham aahithariha yookhumela emosa ya yoovo, wira onanariwa wootepaxa owo aatonko awe omoona, waari, naaroomurimeela niino noopakiwa awaarakaawe ohoolo. Nto owo khimurimeela, ni aahikhala eprokrama ya mutelevisawuni aarowaawe okhala-wo, nto—nto owo khaawerya... Naari mparathoni ni maino makina aawarakaawe ottuli. Nto okathi waalavulaawe, oopa muturi, "whish, whish" ovira vaniinoni vawe. Nto owo khwira wira aahikokhora, avekelaka ni aviheriwaka, minuutu muloko ehinatthi opacerya eprokrama ya mutelevisawuni, nto voakiserya awo khuphwanya muhina mwa ixapattho sawe naamonryaaya mpoolosani mwa ekalsa awe. Mmosa wa anamakuxa matthuka a wooteeli

aahiphwanya, niino nle noopakiwa. Nto Muhano Graham khuthariha yeeyo ya yoowo, vaava. Nto tivo miyo kooruuha vapapheloni yaamukhaani, kinoona wira kooruuha va mBibiliani mwaka.

¹⁵ Nto siiso ti...okathi onkhalaahu owuuluvala vakhani ni ookottokowa, moosuwela, ni saanirimeelaka itthu iya, khennooniha oreera. Nto siiso miyo...okathi waary'aka wu ni Munna Roberson ottuli iwe, ni yaawo, kaamukuttha voosiisu umosa nto khunteya nipattuuxa nikhaani, nto kaahaana orooha wa tothoro a maino, wira oreerihe. Tivo Apwiya yincererye iparakha Saya.

¹⁶ Vano ninrowa, vano, kinrowa ophavela waakhula khula emosa wa seiyo, kawerya vale. Nto, Munna Tony, ni mahala a Muluku, miyo kookhalana otaphuleliwa wa yooloha anyu, nto yaari yooreera. Nkireere otteeliwa murima woona yeeyo. Ni otaphuleliwa wooreera, kinoonaaka wira nkaakhanle ohimyaka vaatthuni va, tivo kinimooleelani voomeekha nyuwo mwa—nyuwo mwaahi...nyuwo mwatthunaru siiso. Owo aarookikoha ohiju uwo, owo aarookhalana yooloha emosa, ni nkaawerya omuleela ele yaaryaaya mpakha kaaronwaaka w'Apwiya khuvekela mwaha wa yeeyo. Vano Apwiya khikuupululela ni khukihimeerya ele yaari otaphuleliwa waya. Ti yooreeraxa, ni ihapari sooreera wa nyuwo, Munna Tony.

¹⁷ Vano, mwa yookoha yoopacerya. Vano, nkinsuwela vatthu voopacerya-vo, okhala wira sothene ti sooreera. Masi, vano, khaninthuna olekela vanci-ene, ni khino ninoowerya omaliha Ttiminku, naahiwerye omaliha olelo.

- 51. Mulakiherye etthu enihimya “ohukhumuni wa mahiku othene,” mwa Matewu 25:46. “Masi e...” Eyo t'ekhanle yookoha.**
- 52. Vano, yookoha ya neenli: “Masi aana a omwene arnowa woomoleliwa ota mw'epiphini,” eyo emosaru ntoko waakumiherya ota wa muupuwelo wa Muluku?**

¹⁸ Ahe, vano, ninkuxa yookoha anyu yoopacerya, yeeyo emphwanyaneya mwa Matewu Oowaarya, miloko miili-...kapiitulu 25. Vano hiyo nino...Vano, miyo nkaatonko osoma iya, kirooweha paahi ottuli iwe, nto kiphavela otthokelela ni waakhula vooreera ka—kaasuwelaaka. Nto wulu...Nyuwo mwaakhunle ni miyo aBibilia anyu, okathi ommusomaahu Yoowo. Vano, kaatthuna kisome mutisionaariyu a eKreku nave, wira mukhalane e—epacerelo aya. Ni miyo—miyo okisivela eyo. Tivo nto ninimoona Eyo mwa soopiili e—mwa soopiili e—Ekreku ni ekina. Nto vano ela enrowa okhala—enrowa okhala murima-murima, ni nisomaka, okhala wira kihanaa orowa ni okuxa Soolempwa khula nipuro kinweryaaka ophwanya, ni okhalicha voopuron'i vaya. Vaareera.

¹⁹ Vano, ookhala ommutthuna Bibilia wira osome? Mwaamutthunaka vale, nvenxe ntata. Ni hiyo... Kinoona wira nihaana araru wala axexe va. Mwatthuna osoma ni Yoolempwa, vaareera. Munna Cox, munnitthuna orwa va okinnya aBibilia ala? Ni ti—ti yooreera wa nyuwo, mwawerya vale, o... (ookhala mmosa, nto nyuwo paahi—nyuwo mwaakuxe ale vale mwatthuna vale, ale anci-ene). Ni khula mutthu ommutthuna mmosa, nvenxe ntata nanyu paahi, mmiravo owo onimooruuhelani, moone. Ni nintthuna nisome seiya vamosa, ni paahi...

²⁰ Vano, mwa osoma nno ni ikapiitulu sookiserya... ikapiitulu thanu na piili soopacerya sa Eliivuruni ya aHeperi. Nuumala wiixuttiha, vekeekhai, amiravo akuminhe iya, myaha iya, Munna Mercier ni Munna Goad, aakumihasa mufiitani nto vano antthunasa okumiherya ntoko eliivuru. Ni aakhalanasa. Vano... ni hata khanikenle nuusu naya, niroowaka paahi vasulu-sulu. Ni kookupali wira awo aareheryasa... ni aakumiha ma—mapattuuxa a eweero a... ni anookuttha mapattuuxa a eweero, mapattuuxa vakhaani paahi a miixuttiho sa aHeperi. Munna Mercier onookhalana vahilekenle, soothittiwa, wa ole onththuna.

²¹ Vano ela mu, enniruua m... Khimukhanle wiixuttiha... mukereja ya ehapari yooreera, okhalaka wira ela ekereja ya ehapari yooreera. Khimukhanle oruuhaka mwi—mwiixuttihi mmosa khuhikumiherya iyaanyiheryo ni miyuupuwelo sa atthu anci-ene. Khimunwerya osyaka. Vano, kiri ottaiwene w'okhala muxuttiha, nnakhala nammooniherya Bibilia. Masi miyo nkineereryeke o—ohimya ethu, wala hata wira ethu p'itthu, kihipacenrye toko—toko okoha wala osuwela vooreeraxa yeeyo.

²² Munna aka mmosa oophenteya ookikoha, nsana ohiyu, owo iirale, “Munna Branham, Munna Seward emara emosa aairale wira nyuwo—nyuwo khimukhanle wiitepanyaka hata nipuro. Moone, wira kweekwe munnikhalana enamuna yo oxerema etthu iyo wira mukhume wala muhaphue yeeyo.”

²³ Miyo khwira, “Ahe, mwaha aya, miyo okathi wothene kimphavela wuupuwela kihinatthi wira ethu p'itthu. Munnona? Vano nto atthu yakikoha, nto kinoowerya waahimeerya iye saari miyuupuwelo saka. Munnona?” Masi eyo ti nyuwo muupuwelaru saana. Nto nyuwo muhinatthi wira ethu, mweehererye okuxa epantte Muluku ontthunaawe wira mukuxe, nto tthiri enookhala yoorika okhala ootepanyiwa.

²⁴ Nyuwo khamwaawerya otthokelela okathi wa—wa Akhabi eerenryaawe omutepanya Eliya. Munniwerya otthokelela okathi aFarisi yeerenrye aya omutepanya Yesu? Moone, Owo aahikhhalana—Owo aahikhhalana yowaakhula naanaanoru, okhala wira itthu sothene Owo siiraawe, aaira ni otthuna wa

Muluku, ni Owo . . . eyo p'inamuna Owo—Owo aaweryaaawe wira. Vano, eyo p'inamuna hiyo entthun'ahu wira ni yeela.

Vano yookoha enikohiwa, ninootthikela yookoha eyo:

Mulakiherye etthu enihimya “ohukhumuni wa mahiku othene,” mwa Matewu 25:46.

²⁵ Vano nwiriyane oratteenexa. Atthu othene vano, Matewu 25:46:

Nto ala anoorowa ohukhumuni wa mahiku othene: . . .

²⁶ Vano, yookoha t'ilal, “Exeeni . . . Mulakiherye . . .” Vano nuulumo *mahiku othene* ninkhuma mwa nuulumo “kweekwe ni *mahiku othene*,” *nto mahiku othene* ti “evirelo y’okathi.” Eyo enihimya paahi “okathi khata,” ntoko *mahiku othene*. Vano nyuwo mwasomaru paahi . . . Miyo nkinsuwenle t’ani olemp sookoha, okhala wira khaavo ohenle nsina naya mwa seiyo; khiyaarin wira, nkintthuna wira yiire, moone.

Masi *ala anoorowa ohukhumuni wa mahiku othene: . . .* (Vano nwehe, awo t’ale ootakhala.)

²⁷ Vano, oophentiwa—mutthu oophentiwa mukohale yookoha, musome paahi Ele ehanle:

. . . masi anaxariya anoorowa weekumini ehinimala.

²⁸ Ale ootakhala anoorowa ohukhumuni wa mahiku othene (evirelo khata y’okathi), masi anaxariya aakhalana Ekumi Ehinimala. Khimunrowa ophwanya ehukhumu Ehinimala, khivanveryaneya okhala. Moone, awo yakhalana ehukhumu Ehinimala, aakhalana Ekumi Ehinimala; awo aakhalana Ekumi Ehinimala, awo t’wooopowa. Moone, khenkhala. Vano mwaweha vale, yo—yookoha ene ehiikoha . . . enniisaakhula eneene. Munnona?

Nto ala . . .

Vano nwehe, miyo kinoosoma vasulu va:

. . . nto awo . . .

²⁹ Mu 20 . . . versiikulu 44:

. . . nave-tho awo yaahaakhula, yaahimwiirela Owo, Piviya, liini naavoliwaahu etala, liini mwaavoliwanyu ntthona, ni muri muletto, ni muthaaleliwe, . . . ni mutthukeliwe, vano nihookhaliheryan?

Nto onoo—vano owo onoowaakhula, wiira, Vekeekhayi, kinooleelani wiira, Ikwhaha sothene sahaamwiirelanyu . . . nnakhala mmosa a axikhaani ala, mwahaakiirela . . . miyo.

Nto ala anoorowa ohukhumuni wa mahiku othene ohokhumuni (wa mahiku othene): (awo t’ale ootakhala) . . . masi anaxariya anoorowa Weekumini Ehinimala.

³⁰ Munnoona evirikanelo? Mutakhali orina ehukhumu ya mahiku othene, masi *mahiku othene* ti “evirelo y’okathi.” Vano, vaakhanle wira yaari emosaru, yaarowa olempwa wira, “Vano ala anoorowa ohukhumuni wa mahiku othene, akina anoorowa weekumini ya mahiku othene.” Munnona? Wala, “Awo anoorowa ohukhumuni Ehinimala, nto akina anoorowa weekumini Ehinimala.” Moone, yaakhanleene ehukhumu Ehinimala, wira ehukhummwe voohimala, vano yookhala Ehinimala...owo orina Ekumi Ehinimala; ni eri Ekumi emosa paahi Ehinimala, nto eyo enkhuma wa Muluku. Sothene sihirina epacerelo khasirina emalelo, sothene sirina epacerelo sookhalana emalelo. Munnoona enihimy’aka?

³¹ Vano, Yoolempwa Yeeyo mu—mutthu ula oophenteya aakhunlyaaewe... Vano nyuwo mwakuxa eyo muleekisiku, “*Nto ala anoorowa okela mu ainion, evirelo y’okathi, ni wa mahi... ni omooroni, onthiyani na mooro.*” Vano, nuulumo *a-i-n-i-o-n* enihimya “evirelo y’okathi wo ohukhummwa.” Mutisionaariyu a Ekreku, va, “evirelo y’okathi wa ehukhumu,” wala, “okathi wa ehukhumu.” Moone, “Awo anoorowa mookathini wa ehukhumu.” Nuulumo ninrumeeliwa va, *a-i-n-i-o-n*. *Ainion*, yeeyo enihimya, “okathi, okathi mmosa, okathi woophimeliwa.” Vano otthikela-tho mo—mootaphuleliwani va, Enkelesi, *mahiku othene* “okathi woophimeliwa.” Moone, enikhuma mw’Ekerku, “ephimeliwo y’okathi.” Nuulumo *ainion*, wala *a-i-n-i-o-n, ainion nnihimya* “okathi wa ehukhumu woophimmwa.”

³² Masi nto musome sikina, “Masi ala anoorowa m’Ohimala.” Eyo ti evirikanelo. Moone, Ekumi Ehinimala. *Ehinimala* enirwa mwa nuulumo na “Ehimalelo,” nto Ehimalelo khiyaarina epacerelo nnakhala emalelo. Ti mahiku othene *ni mahiku othene*. Vano eyo yaahaana waakhula yeeyo, moone, okhala wira nyuwo mwasomaru Yoolempwa oratteenexa, munimoona.

³³ “*Nto ala anoorowa ohukhumuni wa mahiku othene, masi anaxariya...*” Ale ootakhala anoorowa ohukhumuni wa mahiku othene, anoohukhummwa mwa evirelo y’okathi; khino iyaakha epilyawu, miyo nkisuwenle, masi vekekhai nyuwo munooohukhummwa mwaha wa itampi sanyu. Masi siiso ntoko etampi yaarinaaya epacerelo, etampi ehaana emalelo. Ehukhumu yaahikhala epecerelo, ni ehukhumu ehaana emalelo. Nto omooroni opattuxeriwe xetwani ni malaikha awe. Munnona? Vaareera. Vano, kihana ekina va wira kaakhule mwa yeeyo, minuutu vakhani paahi, ekhanle yooreera, enlikanelayeela.

Vano, masi ala va: “**Masi aana a omwene anrowa woomoleliwa ota mw’epiphini,**” eyo emosaru ntoko **waakumiherya ota wa muupuwelo wa Muluku?**

³⁴ Nnari, kihyaarowa okhala emosaru. Vano, nyuwo munihimya va Niira N’othela. Vano, “Nto aana a omwene,”

ntoko sikohiwaaya va. Aana a omwene ti aYuta, nto awo yoomoleliwe ota mw'epiphini. Nto awo—awo animoomoleliwa ota mw'epiphini, ni aavira okathi wo wunla ni olumanyiha maino. Awo yaariheleliwe ota mw'epiphini okhala wira eyo yaamunivaha miyo ni nyuwo okathi wo orukunxa murima, masi awo khanakumiheriweke ota wa muupuwelo wa Muluku. Owo khonkhalakhala omuliyalaka Isarayeli. Ni Isarayeli, ntokokhula musomi a Bibilia onnisuwela, wira anihimmwa “aana a omwene.” Moone, owo omwene, natiri. Mwa moolumo makina, Muluku ovaraka muteko ni nloko, okathi Owo ovanry’awe muteko ni Isarayeli, yaawo akhanle aana a omwene.

³⁵ Vano, muupuwеле, Owo oohimya vo, “Ni Abrahamu ni Isakhi ni Yakope,” nipuro nimosa, “yaamoorwa ekilaathase momweneni okathi wookiserya.” Moone, ni wira Abrahamu, Isakhi ni Yakope yaamurowa okhala momweneni; awo yaari, awo yaari atthu ooreerihwa a momweneni. Masi aana a omwene animoomoleliwa ota mw'epiphini.

³⁶ Vano, vanihimmwa yeela va ti—ti Mutheli. Varwiyyaawe Mutheli, okathi awo yaary’aya...Imwali iharusi thanu saahirowa okumana n’Apwiya, nave—nave awo khiyaarina hata makhura muxamaniyani mwaya. Nto i—ikina thanu saahikuxa makhura muxamaniyani mwaya. Vano, nyuwo mwaweha vale, eyo elatarat yooreera, ya aYuta ni Amalapo, ekhoottiwaka. Musuke mmuruni yeeyo, sinkhala mixovo miraru s’atthu okathi wothene: muYuta, Mmalapo (ookhaleleya),...; muYuta, Mmalapo, ni Ekereja. Mwaatakanxaru awo, tthiri munookhalana mukacamiho mwaphiyaru mwa Wiisuupulula. Maana nyuwo mwaahi...

³⁷ Ntokomwenye Bohanon aakileenle—awe emaara emosa, khwira, “Billy, khula muttu oneererya omusoma Wiisuupulula onoorowa okhalana ettor. Vano,” owo khwira, “va ori Mwaakameliwa va mulaponi mu, ni e—ni ehanasi eniyeeki maasi mwaano mwaya wira ewane ekhotto ni Yoowo.” Ni khwira, “Vano okathi ene yoowo Mwaakameliwa omphwanyaney’awe ntoko atthu ikonto emiya ni ikonto miloko mixexe n’atthu ikonto xexe” (mwiixuttiho wa Anamoona a Yehova) “oMwaako Sinayi. Ni okathi ene yoowo Mwaakameliwa ori Wirimu.” Nnari, nnari, moovonya.

³⁸ Siri mixovo miraru s’atthu. Moone, awo ti, aYuta ookhoottiwa, ni aximwali alolo yaawo maasi...Owo kuhiyo Osuulu wa muthiyana, ti Osuulu wa muthiyana waahanle yoowo ehanasi waayeehenryaaya maasi okhuma mwaano mwaya...Wiisuupulula 11. Vano nto, vekekhai, aYuta ikonto emiya ni ikonto miloko mixexe n’atthu ikonto xexe khiyaari Mwaakameliwa nnakhala, awo t’ale ahanle a ekereja y’aYuta. Nto mwiixuttiho wa Anamoona a Yehova onaahela awo ntokomwaakameliwa, miyo nkinoona moota mwaakhanly’anyu wiiraka yeeyo, okhala wira, kahiyo Mwaakameliwa.

³⁹ Nyuwo mwaweha vale mwa Wiisuupulula vo, Eyo ehimmye wira, "Ni awo aharusi." Ni awo t'ohuliwa. Nto exeeni aari mulipa-oohuliwa? Awo yaari... Alipa-oohuliwa yaari alipa-oolipelela mpaani mookokhorela yaamukhapelela pwiyamwene, okhala wira awo yaari... okhala-... Awo yaari alopwana yaakkalihiwa oohiyara. Awo yaahikhalana... Nyuwo mooweha, wira, "Awo kхиyaaphitaanne n'athiyana"? Awo yaari alipa-oohuliwa a mpaani mookokhorela. Ni waari mwaattelo woorthanleliwa Muluku aakuminhe-awe mwa aYuta oothanliwa. Vano, mwaweha vale... Vaakhanle wira naamuwerya ovaru eyo okathi vakhani paahi, wira ekhale mmuupuweloni mwanyu, vaavo mukhanlyanyaanyu ttthiri...

⁴⁰ Nrowe nikuxe Wiisuupulula, kapiitulu 7, nto ninoophwanya va vano, vaavo... etthu Eyo ehimaly'aya. Eyo etthu yooreera:

Nto nuumala yeela...kaahoona malaikha maxexe yeemenle mmaloothoni maxexe a elapo,... (vano, ela enlikana ni Ezekiyeli 9, vaavo owo oonaly'awe opwetexiwa wa aYuta. Nto va owo onnoona opwetexiwa w'Amalapo, Wiisuupulula, kapiitulu 7) ...Ni kaahoona malaikha maxexe yeemenle mmaloothoni maxexe a elapo, evarelelaka ittheku xexe (ittheku enihimya "ekhotto ni onyakulihana") ...wira ettheku ehoopele mulaponi, hata mphareya,...nnakhala mmwirini. (nto eyo ekhotto, "yaavarelelaaya")

⁴¹ Oh, naakhalanne okathi w'ohimya etthu emosa-emosa mwa yookoha ela. Eyo yiiraneiye...Ti vaavo Russell aaitapanny-awe. Russell aahilaleerya s'eprofeta, oonaka ela orwa. Owo aahilaleerya "wira waarowa okhala Orwa wa Pwiya Yesu," ohisuwelaka wira waari o-otthittiwa wa Ekereja. Munnona?

⁴² Nto awo anootikinihiwa moota ekhotto ya mulaponi... Ekhotto Yoopacerya ya Mulaponi mothene. Nkawehani, eyo yaamanle mahiku yeettaka muloko ni nimosa mweeri wa Novempuru, ewoora yanamuloko ni emosa ya voosiis; mweeri wa namuloko ni mmosa, nihiku na namuloko ni nimosa, ni ewoora yanamuloko n'emosa. Nto naanaanoru nuumala yeeyo, opatiiso wa mmaasini mwa Nsina na Yesu waahuupululiwa ni Opatiiso wa Erooho Yoowaarya wa Ekereja. Vekeekhai, naanaanoru nuumala yeeyo.

⁴³ Mwaroiharu mwa Wiisuupulula, moota niluttaninhe-ahu Eyo vamosa, ni eriyari ya Okathi wa Filatelifiya ni wa Lawotiseya. Ni aMetotista yaahikhalana Okathi wa oFilatelifiya, ophentana w'axinna. Nto okathi wookiserya, okathi wa ekereja, waari Okathi wa Lawotiseya, yoowo waari wookuttihiva. Ni Owo oohimya memmo, "Miyo koohela mukhora (mukhora otthukuliwe) oholo wanyu." Mukhora otthukuliwe! Nto nyuwo mwarowa mwa Soolempwa iyo ottuli

wu, sinooluttaniha Mutthaka wothene nipuro nimosa vo, wira wooniherye oratta-ene.

⁴⁴ Nwehe! Va wira itthu sothene saari Tithi, Mwaana, Erooho Yoowaarya, mwa opatiiso, (yeeyo ninrowaahu okelela naanaanoru) yeeyo yaari eyaaminelo y'eKatolika ni woohikhala mwiixuttiho w'eKristu. Nnari, mulopwana. Miyo paahi... Nookhalana va, ohiy'ula, wira nikelélé yeeyo; ni ninimoona ni leekisiku nave. Munnona? Ayo, mulopwana, ni wahala nave. Khonakhaleke hata mutthu otonko opatisiwa siiso mBibiliani, nnakhala wa miyaakha imiya thanu na mosaa soopacerya nuumala Bibilia. Ni kinoowerya wooniherya va ni mwiixuttiho ene w'eKatolika, wira ti yaawo apacenrye, ni otathela ni oyeeherya.

⁴⁵ Awo akhumme vaavo khukela mukereja ya Wesley, ni ekereja Metotista, aMetotista khuruuha mpakha aPatista, aPatista aaruuhu yeeyo, ni nlelo mwiixuttiho wowootha! Ni kinoowerya owiixuttihani mBibiliani ni owooniheranyi wira Bibilia oohimya wira "mookhalana nsina wira mwa mukumi, masi muhookhwa." Eyo ekekhaii voolekana. Ni awo yaahikhala... .

⁴⁶ Kinoowerya wooniherya wira Bibilia ohiixuttiha wira awo yaamurumeela Nsina Nawe mwa opatiiso mpakha okathi w'epiphi, ntoko o—okathi wa neexexe...wa o—okathi wa ekereja, Okathi wa Ekereja Perkamu. Nto Owo oohimya, mwa, moovirani wa miyaakha seiyo ekonto emosa ni imiya thanu sa okathi w'epiphi, khula mmosa, iirale, "Mookhalana waaryavakhaniohanle, okhala wira khamukhontte Nsina Naka."

⁴⁷ Vaphiyenry'aya okathi uwo mukina vo, okathi w'Ekatolika, Owo iirale, "Nywo mookhalana nsina wira 'mwa mukumi,' masi muhookhwa! Ni mookhotta Nsina Naka." Eyo eri vo. Munnona? Yothene eyo enoolikana mwa elatarato emosa yooreera yuulupale, Bibilia othene.

⁴⁸ Vano nwehe ela:

...evarelenle ittheku xexe...

*Nto kaahoona nlaikha nikina okhuma Wirimu,
naarina ekanyeryo ya Muluku mukumi:... (Ekanyeryo)*

⁴⁹ Vano, exeeni ekhanle ekanyeryo ya Muluku mukumi? Vano, nyuwo axinna Ativentista munrowa ohimya wira, "Osuka nihiku na esaapatu." Kintthuna mukoonihe yeeyo mwa Yoolempwa. Khekhanle mmo. Hata nipuro nimosa khehimmye...e—eyo ekanyeryo...

⁵⁰ Nywo mwasomaru aEfeso 4:30, naanaanoru, munooiphwanya ele ekhanle Ekanyeryo ya Muluku mukumi. aEfeso 4:30 anihimya wira, "Muhiriipihe murima Erooho Yoowaarya ya Muluku yeeyo mutthittiwaanyu ekanyero mpakha nihiku nowoopolya wanyu." Kahi mpakha muhakalalihon tharelana, masi ookhalana nroromelo Ohinimala (uh-

huh). “Muhiriipihe murima Erooho Yoowaarya ya Muluku yeeyo mutthittiwaanyu ekanyero mpakha nihiku nowoopoliwa wanyu.” Moone vakhala wira aEfeso 4:30 khanihimya yeeyo, vano mukuxe isomelo sa mukerekhere ni mutthare Soolempwa sothene vo, munoosuwela. Vano, “Otthittiwa ekanyeryo mpakha nihiku no woopoliwa wanyu. Murineene ekanyeryo ya Muluku mukumi.”

⁵¹ Vano, muupuwele, Erooho Yoowaarya khayiixuttihiwe ntoko Opatiiso wa Erooho Yoowaarya mpakha Ekhotto ya Molumwenkuni Yoopacerya. Ninoomalaru omutthapela awihu—yopeeli ahu a eweero, miyaakha miloko mixexe, ahiiso mwaakha wanamiloko mixexe wa yopeeli.

...nto nlo naahikheweleta vaalupale malaikha awo maxexe, yaavahiwe owerya wo ohonona elapo wala ephareya,

Niraka, Muhihonone elapo, nnakhala ephareya, nnakhala miri, mpakha naatthitte ekanyeryo arumeyi... (vano ninookela mwa yookoha anyu, “aana,” moone)... arumeyi a Muluku ahu vayuuci vaya. (muhihonone, muhipwexakase elapo, muhimuhiye hata kapwitthi a aatomu ophuleya, muhihiyererye ethu ene omalela mpakha arumeyi a Muluku ahu ootthittiwa ekanyeryo)

⁵² Vano, naawerya oroiha eyo vale ni otthikela ottuli wu, moota ele—wira hata *Ovukuwa w'Ekhotto ya Mulaponi mothene*, epante yaneili, okathi Mukhulupale a anakhotto Allenby aawanne-awe mpakha ophiya mmikaanoni wa oYerusalem, vano khulavula muraatiyunni ni Mwene a oInklaterra, khwira, “Nkintthuna woopa ikapwitthi epooma eyo, mwaha wa oreerihiwa waya.” Owo khwira, “Kiireke-ni?”

⁵³ Owo khwira, “Nvekele.”

⁵⁴ Vano owo khuruma ovava ni ntteeke vasulu-sulu, nto vairaly'aya siiso, awo khwira, “Allenby onimoorwa.” Ni yaahikhala Amaka mmwe, yuupuwela wira aahimmye wira, “Allah onimoorwa.” Vano awo khuwelihha epantera yootteela khwiivahererya nto Allenby khukela muYerusalem khukuxa ohimoopale hata kapwitthi, voothariha saalaleeriwe s'eprefeta, eyo ekeekhaii, ni khwaahokoloxerya aYuta.

⁵⁵ Vano khukhumelela Hitler wira aalupatthe aYuta, ni molumwenkuni mothene, khaatthikeliha weiwe.

⁵⁶ Ni Bibilia ohimmye wira Owo aamurowa “waahokoloxa vasulu va mapupha a xawawe.” Nto vapacenryaaya otthika... Erevista *Life* yoolepa ehapari ila isumana vakhani sivinre, weiwo awo yaahokolonwe-aya ikonto sene, orowa oYerusalem, ni yaanaayaara anaxuulu aya ottuli. Awo yaahikohakohiwa. Kookhalana yothene valataratoni. Nto owo khwira... Iwe yoothomeiwa epantera ya ittheneeri xexe ya Davidi, ethomeiwe-

ene iwe; epantera ya khalayixa ya molumwenkuni, emaara yoopacerya enttikinyeya-aya mwa iyaakha ikonto piili.

⁵⁷ Yesu ohimmye wira, “Mwiri wa efiku waaphuwaka iphuwo saya, nloko nla khaninvira.”

⁵⁸ Nto va awo yaanaaruuhu anaxuulu ale, ni wira, “Exeeni? Nyuwo munootthika wira mukhwe elapo anyu?”

⁵⁹ Khwira, “Nnari, hiyo nirweenle omoona Mesiya.”

⁶⁰ Nto, munna, kinimooleelani, hiyo nri vamukhora! Aakhala arumeyi, ale anlipelela iwe. Kahi nikhuru nla n'aYuta naarowa wookumihani maino anyu oopakiwa vaakhanle wira yaaniwerya, awo kahi aYuta Owo onaahimyaawe. Masi t'ale ari iwe ansuka i—ikano ni ithu, ni ahinatoko hata osuwela wira aahikhala Mesiya.

⁶¹ Nto Munna... oEstokolmu, Munna Pethrus, aahaaveleeliherya aWaataana wa Naanaano emilyawu emosa, nto vaawaakhelanse-aya awo yaanaasoma. Awo khwira, “Ahe, ola akhala Mesiya, nintthuna nimoone owo opakaka ethoonyeryo ya profeta, nto hiyo ninoomwaamini.”

⁶² Mureerelo xeeni wa mutteko aka! Kaari muhina mwa iwoora piili wa muttetthe wo oYerusalem, wira kirowe, nto kaari oKairo, wEjitu. Nto miyo kaamweetta vale, nto Erooho Yoowaarya khwira, “Muhirowe naanaano.”

⁶³ Miyo kuupuwela, “Miyo kaamutthokelela paahi. Ettikitti aka kaahithuma, kaari mphironi. Mulopwana mmosa aari weiwe wira akumane ni miyo, nikhuru nothene, ixikola ni sikina.”

⁶⁴ Miyo khweetta kirowaka ohoole vakhani, nto Erooho khwira, “Muhirowe! Muhirowe.”

⁶⁵ Miyo kitthikela wa mulipa ootumiha ittikitti, miyo khwira, “Kinoofuca ettikitti ila. Kinthuna orowa wAteena, oKresiya, oMwaako wa Marte.

⁶⁶ Nto owo khwira, “Ahe, ettikitti anyu ti ya oYerusalem, mulopwana.”

⁶⁷ Miyo khwira, “Kinthuna orowa wAteena ohiya orowa oYerusalem.” Erooho Yoowaarya enoolipelela, okathi uwo khonaphiye nlelo. Khonaphiye tu.

⁶⁸ Nwehe:

...waathitta ekanyeryo arumeyi a Muluku ahu vayuuci vaya,

Nihimyaka wira, Muhihonone elapo,...mpakha hiyo...waathitta ekanyeryo arumeyi a Muluku ahu vayuuci vaya. (khula mutthu onnisuwela wira eyo Ekanyeryo ya Erooho Yoowaarya; nwehe)

Vano kaahiiwa mwaattelo w'ale yaatthittiwe ekanyeryo:...(vano, vakhala wira awo kahiyo aYuta, nwehe ela) ...nto yaahitthittiwa ekanyeryo atthu

ekonto emiya ni ikonto miloko mixexe n'atthu ikonto xexe othene a mahimo a aana a Isarayeli. (khaakhanle hata Mmalapo mwa yaawo. Owo p'ukathi wa wookiseryani)

⁶⁹ Nwehe! Nihimo na Yuta, atthu ikonto muloko ni piili; nihimo na Rupeni, ikonto muloko ni piili; siiso erowaka, Kaati, ikonto muloko ni piili; Nafitali, ni—ni—ni siiso erowaka mpakha Aseri, ni—ni Zepuloni, ni mahimo ala othene muloko ni manli a Isarayeli. Nto muloko ni piili vaara muloko ni piili enkhala kavi? Ikonto emiya ni ikonto miloko mixexe n'atthu ikonto xexe. Aakhala ikonto emiya ni ikonto miloko mixexe n'atthu ikonto xexe, aYuta! Kahi Amalapo, aYuta! Eyo kherina-vo etthu ni Mwaakameliwa. Tivo Anamoona a Yehova aavonya ni mwiixuttihi aya. Bibilia onnihimya voowooneya wira awo “aYuta,” nave kahi Amalapo. Awo t'arumeyi a Muluku, ni Amalapo khanahimmweke okhala murumeyi. Hiyo n'ana alopwana n'athiyana, kahi arumeyi.

⁷⁰ Vano musome Yeeyo ehanle. Ntoko mulopwana olyiye niwuryo, khwira, “Ti noosiva, masi nrowe nilye-tho.” Vaareera, Muluku ookhalana yinci-ene Yeeyo va. Vano, nwehe paahi. Vano, vano niri eversiikulu 8:

Ni a nihimo na Zepuloni... oothittiwa ikonto muloko ni piili. Nihimo nothene na Yosefe yaatthittiwe atthu ikonto muloko ni piili. A nihimo na Peniyamini yaatthittiwe atthu ikonto muloko ni piili.

⁷¹ Moone, Yohani, okhanle muYuta, aahaasuwela khula mmosa a yaawo, aahoona mahimo muloko ni maili a Isarayeli; atthu ikonto muloko ni piili a khula nihimo, muloko ni piili vaara muloko ni piili ankhala ikonto emiya ni ikonto miloko mixexe n'atthu ikonto xexe. Awo vo, kahi Ekereja, aYuta. Bibilia oohimya va, awo yaari othene “aana a Isarayeli,” khula nihimo nooromoliwa.

⁷² Vano nwehe, eversiikulu 9:

Nuumala yeela (vano va onoorwa Mwaakameliwa)...

Nuumala yeela kaahiweha,...kaahoona, muttitthi muulupale w'atthu, yaawo yahaaweryaneya owaalakela,...

⁷³ Awo t'ari alipa-oohuliwa a mpaani mookokhorela, awo atthu ikonto emiya ni ikonto miloko mixexe n'atthu ikonto xexe, vakhani paahi, alipa oolipelela a mpaani mookokhorela vakhani paahi anrowa okhala ni Mwaakameliwa; Awawe—oomuhoola Awe paahi. Awo ti atthu ikonto emiya ni ikonto miloko mixexe n'atthu ikonto xexe, ti alipa-oomuhoola Mwaakameliwa; alipa-oohuliwa a mpaani mookokhorela.

⁷⁴ Nwehe! Vekeekhai, miyo koosuwela wira munrowa va kapiitulu 14, ni wira, “Vano, awo ari ni Mwaakameliwa khula

nipuro awo . . ." Vekeekhai! Alipa-oohuliwa yeetta mukwaha ni pwiyamwene mapuro othene owo aarowaawe. Vekeekhai! Masi awo yaari exeeni? Awo khiyaari etthu woohikhala alipa-oohoola, ni ti voolikana Yoolempwa enihimyaaya wira ti yaawo va.

⁷⁵ Nwehe:

Nto nuumala yeela...nto, kaahoona, muttitthi muulupale w'atthu, yoowo yahaaweryaneya owaalakela, a ilapo sothene,...maloko,...atthu, ni malavulelo,...(vo ori Mwaakameliwa anyu Mmalapo onoorwa, vaareera) ...ala yaari... ohoolo wa Mwaapwittipwithi, (vo ori Moopoli aya, Mwaapwittipwithi, kahi ekano; Mwaapwittipwithi, Mahala) ...ewanre ikuwo sootseela,...(nwehe, minuutu vakhani, moone ikuwo sootseela saahikhale exariya ya alipa ooreera murima)...ni makukhu mmatatani mwaya;

Vano awo yaanikhuwela yiituperyaka,...(vakhala wira ola kuhayo muhakalaliho wa Pentekosite, miyo nkinatoko wiiwa mmosa)...yiiraka, Woopola ti wa Muluku ahu yoowo okilaantthe veehiceni, ni wa Mwaapwittipwithi.

Ni malaikha othene yaahirukurerya ehice, wa mahumu ni axinama axexe,...yaahuuramela mpakha va... ehice mpakha vathi, emukokhorelaka Muluku,

Ehimyaka wira, Amen: Eparakha,...ovuwa,...ankhili,...oxukhureliwa,...nitttimiho,...ikuru, owerya, okhale wa Muluku ahu mahiku othene. Amen.

⁷⁶ Eyo enikhala ntoko okathi wa muthukumano wa mmaxaaaxani, kahi siiso? Onrowa okhala! Owo aari aani? Atthu ikonto emiya ni ikonto miloko mixexe n'atthu ikonto xexe? Nnakhala vakhani! Mwaattelo ola muulupale ahaakhanle mutthu...a maloko othene, malavulelo, ni ilapo. Khamunwerya woona, mpatthani aka oophentiwa?

⁷⁷ Vano nwehe, musome Yeeyo paahi. Vano:

Nto mmosa wa mahumu aahaakhula akiirelaka, Ala taani ni...awanre ikuwo sootseela? ni ankhuma woowi?

⁷⁸ Humu aahimwiirela Yohani, yoowo aari muYuta aasuwenle atthu ikonto emiya ni ikonto miloko mixexe n'atthu ikonto xexe, khwira, "Vano, nyuwo munnaasuwela awo, awo othene t'aYuta. Masi ala taani? Awo yaakhumme woowi?" Muhoona etthu humu aahimmyaawe? "Mmosa wa ahumu aahaakhula," (awo t'ahumu ohoolo wa Ehice) "aahikhaakhula, airaka, 'Ala taani awanre ikuwo sootseela? Ni awo akhumme woowi? Vano, hiyo othene ninnaasuwela aYuta ni waataana waya ni sikina, masi ala aruule liini?" Vano nwehe:

Nto miyo kaahimwiirela wira, Napwiya, nyuwo musuwenle. (“Miyo—miyo—miyo nkisuwenle,” Yohani khwira, “yookivira. Miyo nkisuwenle.”) *Vano owo aahikileela wira, Ala ti yaale akhumme moohaawani uuulupale,* (“Avinre moweehereriwani ni ihasara iya sinci-ene, miteko ni matapha, seiyo miyo kivinryaakamo.” Munnona?) . . . ala akhumme moohaawani *uuulupale*, ni *akanthe ikuwo saya*, . . . (mukereja? Eyo enniweya saana?) . . . *akanthe ikuwo saya*, etteeliha *mphomeni mwa Mwaapwittipwitthi*.

. . . awo aryaaya *oohoole w'ehice ya Muluku, ni enamurumeela Yoowo othana n'uhiyu . . .* (taani anikirumeela owannyaka? Amwaar'aka. Eyo ekeekhai?) . . . *ni mpaani mwAwe: . . .* (ti yaawo ankhala ni miyo owannyaka ni mwa esukeryo aka, t'amwaar'aka. Ti yaawo ankilaathi ni miyo, ni ankattha ikuwo saka, ni ankhaliha itthu soolikana wa miyo) . . . *nave ole onkilaathi veehiceni onookhala eriyari aya.* (Oh, wulu, nwiriyane!)

Nto awo khanrowa ovoliwaka-tho etala, . . . (yaakhala ntoko yaahiyeela soolya kamosa-kamosa erwaaka) . . . *nnakhala khanrowa ovoliwaka nthona; hata khanrowa woopeliwa nsuwa tho, nnakhala oviha okina.*

Okhala wira Mwaapwittipwitthi ori variyari va ehice onaanweettiherya, ni tonrowa waahoolaka mpakha mweephathuweloni mwa maasi a ekumi: nave Muluku onimwaavuta . . . maithori othene mmaithoni mwaya. (Owo ori vo, owo ti Mwaakameliwa)

⁷⁹ Vo t'ari atthu anyu ikonto emiya ni ikonto miloko mixexe n'atthu ikonto xexe, awo t'arumeyi anyu. Tivo “aana a Omwene” va, mutthu oophentiwa mukonhe yookoha ela, ti . . . ole okonhe yookoha ela yoosuwanyeya. Kinoona wira kaahihiya ottuli nno mu . . . nipuro nlo, masi “okathi awo anoomoliwaaya,” khenihimya wira anookumihiwa mmuupuweloni mwa Muluku. Awo animoomoliwa mwa sooreera sa erooho mwa ehuhu emosa. Moone, wa ehuhu vakhani paahi.

⁸⁰ Okhala wira, okathi profeta omoonal'y'awe Isarayeli nihiku nla owo aarowaawe ophiya, owo iirale, “Ahe, exeeni onrowa okhala Isarayeli okathi Esaapatu enrow'aya okumihowi, ni—ni awo annitumihia Saapatu enamuna emosaru ntoko nihiku nikina, n'itthu sothene iya?” Owo aarookoha, “Ahe, Nyuwo munu—Nyuwo munu . . . Isarayeli onooliyaliwa voomalela?”

⁸¹ Owo iirale, “Erakamelo xeeni oryaaya mpakha wirimu? Wiixa xeeni eryaaya elapo? Mphime ni ekopo eyo eri ohoole wanyu.”

Owo khwira, “Nkinwerya!”

⁸² Owo khwira, “Ni Miyo nkinkhalakhala kimuliyalaka Isarayeli.” Vekeekhai nnari! Isarayeli khonkhalakhala oliyaliwaka.

⁸³ Tivo, moone, *mahiku othene* ni *Ehimimala* itthu piili soovirikana. Isarayeli ohoomoliwa, masi kahi mmuupuweloni mwa Muluku. Ni Paulo onnihimya va, kaarina...kaarina okathi w’osoma, naanaanoru kaamuhimya Yoolempwa e...kaanwerya woohimeeryani seijo, moone, ele enrwa mmuupuweloni mwaka.

⁸⁴ Paulo alavulaka vo, ohimmye wira hiyo Amalapo nikasoope, enamuna nineett’ahu ni ethu eniiraahu. Munnona? Okhala wira vakhala wira Muluku kholevelenle erintta yoopacerya, moone, nto hiyo nittopanyeriwe, moone,...Ni Isarayeli, yoowo aakhalihiwe oo hoona wa ehuhu emosa, owo ohimmyaawe. Ehuhu vakhani paahi, Isarayeli ookhalihiwa oo hoona. Ti yeeyo, masi ekuwo enookumihiwa mmaithoni mwaya. Nto owo p’ukathi Mmalapo ookiserya oniyariw’awe Momweneni mwa Muluku, nto ekuwo aya enookumihiwa mmaithoni mwa Isarayeli. Nto awo animwiira, “Ola ti Mesiya Yoowo hiyo nrwenlyahu omoona.” Ti yeeyo, masi mukhora w’Amalapo woowaliwa (ekalawa yo—yoowaliwa), khankhala-tho—khankhala-tho mahala ahanle wa Amalapo okathi uwo.

⁸⁵ Vano, kookuxa okathi munci-ene mwa yookoha emosa. Nto mutthu onimwiira, “Vano nyuwo khamunkuxa yawaka.” Ahe, nnimwaakuva noone naaweryaka ophiyerya.

⁸⁶ Vaareera, va yookhala emosa—emosa yoorakama. Ni yothene muthiyana wala mulopwana okohaly’awe, wala onakhaleru pani, ti yoolikana.

53. Kehiyo ekekhai wira Pwiya Yesu khokhwenle olumwenku woethene, ehimyaka wira atthu othene molumwenkuni, woohikhala... (vano, miyo kinoolakiherya yeeyo, masi owo...mulopwana wala muthiyana, onakhaleru mutthu pani...Onkhala ntoko olepa wa muthiyana)... woohikhala ale—woohikhala ale mapuro oohiyana-hiyana molumwenkuni, yaawo Atithi yaanvahaly’aya Yoowo? Yaale ohinatti opattuxiwa olumwenku, Muluku aatthomenlyaaawe Ekumi Ehimala, khwaathanla vootthuna Wawe Yoowo?

⁸⁷ Vekeekhai, eyo ti yoolikana! Vekeekhai ti yeeyo. Yesu okhwenle...kahi paahi wa...Owo aahiivaha.

⁸⁸ Nrowe noone, kookupali wira e...Miyo—miyo kookupali wira awo anoosoma...yookoha emosa enlikana ni yeela:

54. Yoolempwa vekeekhai enninihimeerya wira ala t’ale ahinrowa okhala—t’ale ahinrowa woopowa. Tivo...

⁸⁹ Eyo ekekhai voolikana. Yoolempwa enninihimeerya wira aakhala atthu aatthomeliwe ni Muluku ohukhummwa.

⁹⁰ Mwaanitthuna osoma yeeyo, wira ohikhale-tho ohoverya mmuupuweloni mwanyu? Vaareera, nrowe nikunle vano Muliivuruni mwa—mwa Yuta, Yuta alavulaka va.

Yuta, murumeyi a Yesu Kristu, munawewe Yakopo, w'ale yiihaneliwe, oreerihiwa ni Muluku Tithi, ni ankhapeleliwa mwa Yesu Kristu:

⁹¹ Munnywoona ale onaaveleelihery'awe Yeeyo? Kahi natampi, kahi muteko w'olaleya paahi, masi w'ale ooreerihiwa ni oowiihaniwa. Moone, ale ari Momweneneni.

Mooneliwe othunku, ni nvahiwe murettele, ni ophenta, voowaatta.

Anoophentaakani, . . . kaathunexa woolepelani ni osuwela waka wothene mwaha wo woopowa wahu hiyo othene, kaanitthunexa woolepelani, ni wootumereryani . . . ekhotto yoowanela waamini yoowo yaavahiwaya atthu ooreera murima.

Tthiri aakhala atthu yiikenlinhe voohikasoopa, yaawo okhuma khalayi yaalamuleliwe ehukhumu yeela, . . . (sayi?) . . . anrukunxela mahala a Muluku ahu itthu soonanara, . . .

⁹² Oolamuleliwa khalayi! Kahi wira Muluku aarookilaathi veehiceni, khwira, “Kinoomoopola mulopwana ola, kinoompwetexa ole.” Khiyaari siiso! Muluku okhwiyiye, ni okathi Yesu okhwiyaaawe, mukuttho wookhuneela elapo yothene wa khula mutthu. Masi Muluku, mwa osuwela khalayi ene . . . Kahi wira Owo onoothuna . . . Owo khontthuna wira hata mutthu opweteye. Owoaatthuna wira atthu othene yoopowe. Eyo yaari Yawawe—yaari ethunelo Awe Ehinimala. Masi vakhala wira Owo aari Muluku, Owo aahisuwela t'ani aarowa ni t'ani ahaarowa woopowa. Vakhala wira Owo khaasuwela, weeso khaari Muluku ohinimala. Tivo Bibilia onniixuttiha yeeyo. Hiyo naamuwerya . . .

⁹³ Naakhalanne okathi w'okhunla mu mwa aRooma, kapiitulu 8, ni mwaamuwerya osoma. Arooma, kapiitulu 9, mapuro manciene makina mBibiliani. aEfeso, kapiitulu 1. Nto munowerya woona wira othanla wa Muluku, wira okhale woomaliheriwa, Muluku aahivaha waataana voohitthuneya ethu. Owo oonveleeliha Yesu wira aakhwele ale Owo aasuwenly'awe khalayi ene. Munnona?

⁹⁴ Kahi wira paahi, “Ahe, nyuwo muniira wira Muluku khonsuwela sinto muthiyan'ovo onimoopowa wala nnari?” Muluku aahisuwela wira mwaamoopowa, wala sinto mwaamoopowa wala nnari, olumwenku ohinatthi hata opacerya, ahiiso Owo khaari Muluku.

⁹⁵ Nyuwo munnisuwela ethu nuulumo *ehinimala nnihimy'aya?* Nwehe va . . . nwehe mutisiyonariyuni mphwanye ele enihimyia

nuulumo *ehinimala*. Vano, Owo aahisuwela khula eyaasu yaarowa okhalakhala ekhalaka mulaponi, khula ephepele, khula epwilimwithi, khula eropo. Owo aahisuwela khalayi iyo sihinatthi ophiyerya okhala, ahiiso Owo khaari Muluku. Vekeekhai, Owo aahisuwela. Vaareera.

⁹⁶ Vano, mwemmo, Muluku khaakhanle—ohimyaka wira, “Miyo kinookuxani *nyuwo*, ni kooroiheni omooroni; ni kinookuxani *nyuwo*, ni kooroiheni Wirimu.” Muluku aaththuna wira nyuwo oowanli murowe Wirimu. Masi mwaha w’osuwela khalayi ene Owo aahisuwela wira mmosa aarowa okhala namawoka, nto mukina aarowa okhala oolakeya ni muKristu. Munnona? Tivo Owo aahaana onveeleliha Yesu wira akhwe, wira amoopole mutthu ule Owo aasuwenly’awe khalayi ene wira aaniththuna woopowa. Munniwa?

Vano nkawehani va:

Soolempwa vekeekhai sinninihimeerya wira ala t’ale ahinrowa woopowa.

55. **Tivo vakhala wira mukuttho wookhuneela yothene... nloko nothene na Atamu, nto akina khupweteya okhala wira awo khamuttottenle muraarel natiri, wala evaheryo, khivaatthuneya...ikuru...mahala...owo ono...khiyaarowa okhala ikuru sooweryaxa ovikana iphavelelo Soohimala ni itthunelo sa Muluku Oowerya sothene? Yaamukhala... (Mutthu vano, yookoha ela ya nenli, onookoha.) Otthuna wa mutthu khiyaarowa okhala wa ikuru sooweryaxa ovikana iphavelelo Soohimala ni eththunelo ya Muluku Oowerya sothene?**

⁹⁷ Nnari, munn’aka mulopwana wala muthiyana. Vekeekhai nnari! Khiivo hat’ethu ekhanle yooweryaxa... Otthuna wa mutthu khiyaakhalakhala oweryaka olirkinyihiwa ni e—eththunelo Ehinimala ya nlamulo na Muluku. Khivaaweryaneya okhala, moone.

⁹⁸ Vano, yookoha anyu yoopacerya yaari yoolikana. Yookoha anyu ya neenli khivaaweryaneya okhala, mpatthani. Maana nwehe, nwehe moota silempwaly’aya va, moone: “Otthuna wa mutthu khiyaarowa okhala wa ikuru sooweryaxa ovikana iphavelelo Soohimala ni eththunelo ya Muluku Oowerya sothene?” Vano, vekeekhai nnari. Vaarowa oweryaneya sayi otthuna wa mutthu okhala wa ikuru sooweryaxa ovikana eththunelo ya Muluku Oowerya sothene? Nto mutthu mwa mukhalelo awe w’erutthu wira ethtu owo ontthun’awe, okhala wooweryaxa onvikana Muluku Ohinimala, ooloka voomalela saarowaawe okhala? Vekeekhai nnari! Khivaaweryaneya okhala, moone. Muluku Ohinimala, eththunelo Awe ekhanle yooloka voomalela, mwaarowa owerya sayi ohimya wira mu—mutthu a erutthu vathi va, voohicala naxariya xeeni (ni owo aakhanlyaawe okhalaka), itthunelo sawe khisaarowa nnakhala

olikana ni yeela: e—etthunelo ya Muluku Ohinimala ni Oowerya sothene.

⁹⁹ [Munna mmosa muthiyana onlavula ni Munna Branham—Mol.] Ayo. [“Mukilevelele. Miyo kaatthuna okoha ethu paahi, nto—nto nyuwo muroohisuwela saana ele enihimy’aka vo.”] Ayo, vaareera, munna. [“Miyo nkinaamini iyo hata vakhani, kitthunne ohimya wira ‘ethunelo Ehinimala ya Muluku eri vasulu va otthuna wa mutthu.”]

¹⁰⁰ Eyo ti yoolikana. Oh, ahe, miyo—miyo kisomme voovonyeya nto, moone. Vaareera. Ayo, nyuwo mookhalana exariya nto, munna. Miyo nkaasuwela wira yaari yawinyu—yookoha anyu. Vaareera. Masi, moone, moota orinaaka va, moone,... Vano mukihiye koone, “Onnikhuneela nloko nothene n’Atamu, nto akina aapweteya okhala wira awo kхиyaattottenle muraarelwa yaawo—wa yaawo evaheryo aya, otthuna wa mutthu kхиwaarowa okhala wa ikuru sooweryaxa ovikana iphavelelo Soohimala ni ethunelo ya Muluku Oowerya sothene?” Moone, miyo—miyo kaarootaphulela voovonyeya muupuwelo anyu vo. Ayo, ethunelo Ehinimala ya Muluku Oowerya sothene. Ahe, eyo ennikhaliha oratta-ene.

¹⁰¹ Miyo kinoona wira atthu othene anniwa saana yeeyo. Vakhala siiso, nvenxe matata. Eyo—ti ethunelo Ehinimala ya Muluku Oowerya sothene, tthiri eri vasulu saana—vasulu saana va etthu mutthu aakhanly’awe wiiraka.

Vano:

56. Nkinsuwela saana waarya mwa opatiiso wa mmaasini, kapiitulu 28 ya...versiikulu 19, ya Matewu. Enihimy exeeni?

¹⁰² Ahe, vano, khino khenrowa okikuxa minuutu woovikana mmosa. Nto mutthu omukhunle ni miyo, Matewu, kapiitulu 28, versiikulu 19. Nto hiyo ninoosuwela, etthu mutthu ery’awe... miloko miili ni thanu... Vano, Ela enimookhalihani oolipa nyuwo mwakhalaru ni Yeeyo paahi. Ti—Ti yooreera, moone. Kehiyo y’elaleeryo ehapari, masi Ti...

¹⁰³ Vano hiyo nri... Vano va ti vatthu atthu aneerery’aya ohimya wira, “Yookhala evirikanyelo mBibiliani.” Vano, kintthuna wira mutthu akhunle... ni Matewu 28:19. Wala, nnari, kintthuna wira mutthu... Matewu 28:19. Kintthuna wira mutthu akhunle Miteko 2:38. Nyuwo mookhalana Bibilia anyu vo, Munna Neville?

¹⁰⁴ Ni kintthuna wira ni nyuwo musome vano. “Nto miyo kinoowoonihani evirikanyelo yoolipa mBibiliani. Nto ele e—Bibilia... Atthu aniira ‘Bibilia khoniivirkanya,’ Kintthuna wira mutthokelele ela.”

¹⁰⁵ Nto ela enniwiiriha awiixuttihi okhala oottweelela. Masi Eyo—Ti yookhweya. Vano kinoomusoma Matewu 28:19, nyuwo

mukitthareke. Ni akina a nyuwo ni Miteko 2:38, mukhalane oolikana. Kimpacerya eversiikulu 18, ela ekapiitulu yookiserya ya Matewu:

*Nto Yesu aahirwa khwaaleela awiixu-...ahaaleela,
wira, Koovahiwa owerya wothene wirimu ni vathi.
(owerya w'Atithi ori vayi?)*

¹⁰⁶ Vakhala wira owerya wothene Wirimu ni vathi onivahiwa Yesu, weeso Muluku onkhala ohirina owerya, kahi siiso? Wala Owo onihimenrye ethale paahi? Owo aaira iperwa? Owoaatthuna ohimya Yeeyo! Khimunaamini wira Owoaatthuna ohimya Yeeyo? Ahe, vakhala wira owerya wothene onivahiwa Yoowo, ori vayi owerya wa Muluku nto? Owo aari Muluku! Eyo ekekhaai. Eyo t'itthu yothene ekhanle. Ti yothene yaakhanle vale. Moone, Owo aari Muluku; wala aahikhala mutthu aakilaanthe vale, aarina owerya, ohirina-tho. Munnona? Tivo nyuwo khimukhanle—nyuwo khimukhanle otepanyaka Eyo. Hiyo ninookelela etthu emosaru yeeyo va. Vaareera:

*...Owerya wothene wirimu ni vathi ti...wirimu ni
vathi.*

*Vano murowe,...mwawiixuttihe atthu a maloko
othene, mwaapatisaka ni nsina n'Atithi, ni na Mwaana,
ni na Erooho Yoowaarya:*

*Mwawiixuttihe weettela sothene soorumalyakani:...
nto, Miyo kinookhala ni nyuwo mahiku othene, mpakha
omala olumuwenku.*

¹⁰⁷ Miteko 2:38, vano mutthu omusome. Nwehererye minuutu mmosa paahi. Miteko, kapiitulu 2, versiikulu 38. Vano, nwiriyane oratteene vano, ni nvilele paahi, nto ninimoona vano. Vano, ala mahiku muloko nuumala Yesu waaleela vano, Matewu 28:19, “Vano murowe, mwawiixuttihe atthu a maloko othene, mwaapatisaka ni nsina n'Atithi, na Mwaana, ni na Erooho Yoowaarya.”

¹⁰⁸ Vano, Petru, mahiku muloko ohoole waya... Awo khiyalaleyanse elaleeryo ekina. Awo yaahiwela empa y'osulu ya oYerusalem, khulipelelasa weiwe (mahiku muloko) wira Erooho Yoowaarya erwe. Akavi ansuwela yeeyo? Nipuro nla va. Va ori Petru, Petru orina ihulelo sa Momweneni. Vaareera, ninrowa woona etthu eniir'awe. Matewu, ahiiso kinihimy Miteko 2, nrowe nikuxe versiikulu 36:

*Tivo atthu othene a Isarayeli musuweleke vekekhai,
wira Muluku oomukhaliha Yesu yoowo, nyuwo ...
mmukhomenyanyu, Pwiya ni Kristu.*

“Pwiya ni Kristu.” Khivanxankiha, owerya wothene wirimu ni vathi ovahiwaawe Yoowo.

Vano awo vaiwaly'aya yeela, waahaariipa murima vanci-ene, yaahimwiirela Petru ni...n'arummwa akina, Alopwana ni axinna, niireke-ni?

Petru aahaakhula wira...Petru aahaahimeerya wira, Murukunuxē murima, khula mmosa a nyuwo, ni mpatisiwe ni nsina na Yesu Kristu wira muleveleliwe itampi, nto munimwaakhela yoovaha ya Erooho Yoowaarya.

¹⁰⁹ Vano, vo yookhala evirikanyelo, Matewu ohimmye wira, "Mwaapatise ni Nsina: Tithi, Mwaana, Erooho Yoowaarya," nto Petru kuhimya mwa Miteko 2:38, mahiku muloko ohoolo waya, "Murukunxe murima, mpatisiwe ni Nsina na Yesu Kristu."

¹¹⁰ Vano okathi woottharelana orukunuxa murima waahimmwe—waahimmwe aya, ahiiso, opatiiso, mBibiliani, ti Miteko ka—kapiitulu 8, okathi Filipe aaronwaawe khwaalaleerya a...a—a aSamariya. Vano awo yaahaakhela Erooho Yoowaarya, ni yaahipatisiwa ni Nsina na Yesu Kristu.

¹¹¹ Okathi woottharelana waalavuliwaaya, waari okathi Amalapo yaakhenly'aya Yeeyo, Miteko 10:49:

Nto nlelo Petru...olavulaka moolomo ala, okathi yoowo, Erooho Yoowaarya yaahaakhuruwela...ale... ni yaaniwiwa.

Okhala wira yaaniwiwa elavulaka malavulelo, ni omuttottopela Muluku. Nto aahaakhula Petru,

Ookhala oniwerya okhoottiha maasi, woonaka wira ala...ahaakhela Erooho Yoowaarya ntoko hiyo saakhenlyaaahu wopaceryani?

Nto owo aahiruma wira epatisiwe ni nsina n'Apwiya Yesu Kristu.

¹¹² Vano mukihiye kikhlanet ethu emosa va, wira kiwooniheni paahi ethu yaamukhaani wira muhiliyale; kinrowa opaka eyooniheryo yaamukhaani. Kinrowa ohela...Akavi malo... ilapo s'atthu akhanle molumwenkuni? Ari mararu: atthu a Khami, Semi, ni Yafeti. Akavi ansuwela yeeyo? Hiyo nikhumme mwa aana ale araru a Nowe. Atthu a Khami, atthu a Semi... Atthu a Yafeti ti atthu Anklo-Saksoni, atthu a Semi ti a... Maloko mararu, awo ti: muYuta, Mmalapo, ni nuusu muYuta ni Mmalapo. Vano, nwehe, okathi ole vale...nto *ola* ti Khami... Semi, Khami, ni Yafeti.

¹¹³ Vano, opatiiso woopacerya otonko ohimmwa, waahimmwe ni Yohani Mpatisa. Akavi ansuwela wira eyo ekekhai? Vaareera, kinrowa olipiheryo *ela* va, vaava va, Yohani Mpatisa. Nto Yohani aapatisa atthu omuro Yordani, aarumaka wira yaahaana orukunxa murima wiireherya ni Muluku, n'utumiha mireerelo saya, ni waalyiha alipa-oohaawa, ni anakhotto okhala owaaphiyerya musurukhu aya, ni wiireherya ni Muluku. Akavi

ansuwela yeeyo? Nto owo aapatisa mmuro Yordani, kahi waayeeherya, kahi waatathela maasi, masi aamwaapwiniha! Mwaahaaminiki Yeeyo, va eri eleeksiku, musuwele vakhala wira kahi *baptizo*, yeeyo ekhanle “opatisa, opwinihwa, ohela vathi, osikhiwa.” Vano, emaara yoopacerya opatiiso waatonko aya ohimmwa, waari vaavo.

¹¹⁴ Emaara yaneenli opatiiso waatonko aya ohimmwa, Yesu t’arumme, Matewu 28:19.

¹¹⁵ Emaara yoottharelana opatiiso waalavuliwaaya, waari Miteko 2:38.

¹¹⁶ Emaara yoottharelana opatiiso waalavuliwaaya, waari kapiitulu 8 ya Miteko.

¹¹⁷ Emaara yootharelana opatiiso waalavuliwaaya, waari mu—mukapiitulu 10 ya Miteko.

¹¹⁸ Vano okhuma va ninvira okathi Yesu ohimalyaawe, va, “Vano murowe, mwawiixuttiheke atthu a maloko othene, mwaapatisaka ni Nsina n’Atithi, ni Mwaana, Erooho Yoowaarya.”

¹¹⁹ Vano nrowe nilakiherye Yoolempwa ela, toko. Miyo kihoolelani wira “khiivo hata Yoolempwa emosa mBibiliani enrowa ovaanyiha ekina.” Kintthuna wira nyuwo mukiruuhele. Miyo kinnivekela yeeyo mwa miyaakha miloko miili ni mithanu na mosa, nave nlelo nkinatthi ophwanya. Khiivo hata Yoolempwa enviri—. . . Vakhala wira ennivirikanya Yeeyo, vano eyo ethu muttu olemppe-awe. Nnari, mulopwana, khekhanle evirikanyelo mBibiliani!

¹²⁰ Vano ela nyuwo muhimmye wira, “Ankhi *iyo*?”

¹²¹ Va omphwanyaneya Yesu ohimyaka wira, “Vano murowe, mwawiixuttihe atthu a maloko othene, mwaapatisaka ni Nsina n’Atithi, Mwaana, Erooho Yoowaarya.”

¹²² Nto Petru khunarukunuwa naanaanoru, khwira, “Murukunxe murima, khula mmosa a nyuwo, mpatisiwe ni Nsina na Yesu Kristu.”

¹²³ “Vo ti vari evirikanyelo anyu.” Enikhala ntoko yeeyo. Vano, nyuwo mwaasomaka ni muupuwelo wa mw’erutthuni, ni woohikhala ni murima wootthukuwa, enookhala evirikanyelo.

¹²⁴ Masi nyuwo mwasomaru Iyo ni muupuwelo wootthukuwa, “Erooho Yoowaarya erimwiipitiherya ela maitho a ale oosuwela ni a miruku,” Yesu ohimmye siiso, ni oomuxukhuru Muluku mwaha wa yeeyo, “ni owuupululela anamwane wira esuwele.” Mwakhalana muupuwelo, ni kahi muupuwelo wo wiisoona, masi murima wootthuna wiixutta, Erooho Yoowaarya enoowiixuttihani itthu iya.

¹²⁵ Vano yaahilikanyihe... Nyuwo muhimmye wira, “Munsuwela sayi wira mookhalana exariya?” Ahe, eyo enlikana

ni Yoolempwa ekina. Yaahikhale, nyuwo munookhalana vekeekhai evirikanyelo va.

¹²⁶ Vano kintthuna kookoheni ethu. Ela ekapiitulu yookiserya ya Matewu. Miyo kinookuxa mwa enamuna emosa yaamukhaani, wira khula mmosa a nyuwo...aana musuwele saana Yeeyo.

¹²⁷ Mwa nlikanyiho, nyuwo mwamusomaru wahala a mphento, ni ottuli waya khuhimya wira, "Nto Maria ni Yohani yaakhalasa ehakalalaka murima mahiku othene." Ahe, nyuwo munimwiikoha taani yaari Yohani ni Maria yaakhanle ehakalalaka murima mahiku othene. Vano, mwaatthunaka osuwela taani okhanle Yohani ni Maria, vanreerela mutthikele ottuli wa eliivuru musuwele taani okhanle Yohani ni Maria. Vano othikela nno khusuwela taani aari Maria, ni emusi owo onikhumaawe-wo; ni wira taani aari Yohani, ni emusi owo onikhumaawe-wo, ni nle naari nsina nawe, ni moota awo athelananse-aya, ni sothene sa yeeyo. Eyo ekekhaii?

¹²⁸ Ahe, eyo ethu emosaru ni omusoma Bibilia va. Okathi... Nkawehani, Yesu khonahimyeke wira, "Murowe mwaapatise atthu ni nsina n'Atithi, ni nsina na Mwaana, ni nsina na Erooho Yoowaarya," enamuna atthu a oraaru ampatisaaya. Khekhanle hata Yoolempwa emosa ya yeeyo mBibiliani. Owo khonahimyeke wira, "Ni masina (m-a-s-i-n-a), masina" a Tithi, Mwaana, ni Erooho Yoowaarya.

¹²⁹ Owo ohimmye wira, "Ni (n-s-i-n-a) nsina," nimosa nene. Nkanweheni Bibilia anyu vo ni nwehe yaakhanle-ene ekekhai, Matewu 28, "Ni Nsina."

¹³⁰ Kahi "ni nsina n'Atithi, ni nsina na Mwaana,..." eyo ti enamuna mulaleyi a oraaru ompatisaawe. "Ni nsina n'Atithi, ni nsina na Mwaana, ni nsina na Erooho Yoowaarya." Eyo hata khekhanle mBibiliani.

¹³¹ "Vano ni nsina..." Nyuwo muhimmye wira, "Ahe, nto ni nsina na 'Tithi, Mwaana, ni Erooho Yoowaarya.'" Vano nookhala Nsina nimosa vo.

¹³² Ahe, *tiithi* nsinaa? Akavi ansuwela wira *tiithi* khanihiyi nsina? *Tiithi* etiitulu. *Mwaana* khanihiyi nsina. Akavi ansuwela wira *mwaana* khanihiyi nsina? Axitiiithi akavi ari mu? Nvenxe ntata nanyu. Aana akavi ari mu? Nvenxe matata. Ahe, t'ani a nyuwo oniihaniwa "Mwaana"? Taani a nyuwo oniihaniwa "Tiithi"? Vaareera, *Erooho Yoowaarya* khanihiyi nsina, *Erooho Yoowaarya* t'ile Eyo ekhanly'aya. Atthu akavi ari mu? Nvenxe ntata nanyu. Munnona? Eyo vo, *Erooho Yoowaarya* t'ile Eyo ekhanly'aya. *Tiithi*, *Mwaana*, ni *Erooho Yoowaarya*, khaavo hata mmosa akhanle masina; khanivo nsina na yeeyo.

¹³³ Ahe, nto, vakhala wira Owo ohimmye wira, "Mwaapatise ni Nsina n'Atithi, Mwaana ni Erooho Yoowaarya," vaareerela nitthikele ottuli nisuwele Taani okhanle Tithi, Mwaana, ni

Erooho Yoowaarya. Nrowe nikhunle kapiitulu 1 ya Matewu nto, noone Taani aari Mutthu ula vaatthunyea wira nipayiseke mwa Nsina nawe. Nto nimpacerya vano ni Matewu, kapiitulu 1, versiikulu 18. Musome oratteene, othene anyu.

¹³⁴ Vano, nyuwo mukohale yookoha, kintthuna kooniherye eyooniheryo yaamukhaani va. Vano kinrowa ohela itthu tthaaru va wira musuwele oratteene, (opaka eyooniheryo) aBibilia ala ni ilivuru, wira kipake eyooniheryo.

¹³⁵ Vaareera, kintthuna wira mukiwehe oratteene, ni khula mmosa okitthereke vano. Vano, *ola* va ti Muluku Tithi. *Ola* va ti Muluku Mwaana. *Ola* va ti Muluku Erooho Yoowaarya. Vano, akavi ansuwela saana? Nyuwo muhimyeke nuumala miyo. Taani ula *va*? [Muthukumano oniira, “Erooho Yoowaarya.” — Mol.] Erooho Yoowaarya. Taani ula *va*? [“Tithi.”] Taani ula *va*? [“Mwaana.”] Vano, eyo p’inamuna atthu a oraaru anaamini aya, Moone, eyo ennikhalika hiyo apakawu, voowooneyaxa vanweryaneyaaaya okhala.

¹³⁶ muYuta; mwaha wa yeeyo muhikhanlyaanyu ophwanyaka etthu ni muYuta. Owo ohimmye wira, “Khimukhanle omuthikilaka Muluku ipantte tthaaru khunvaha muYuta.” Masi, vekeekhai nnari, nnakhala miyo. Munnona? Nnari, mulopwana. Owo Muluku mmosa. Eyo ekeekhai. Kahi aMuluku araru. Vano nwehe moota—moota—moota Eyo eryaaya yookhweya.

¹³⁷ Vano ninrowa osuwela. Vano, t’ani... *Ola* ti Pani? Mutthu ohimye vano. Muluku Mwaana. Eyo ekeekhai? *Ola* ti Mwaana. Ahe, nto Atithi Awe ti Muluku. Eyo ekeekhai? Akavi anaamini wira Atithi Awe ti Muluku? Nvenxe ntata nanyu. Akavi anaamini wira Muluku ti Tithi awe Yesu Kristu? Vaareera.

Vano oyariwa wa Yesu Kristu wiireiye so:...

¹³⁸ Vano ninrowa otthikela ottuli wira nisuwele T’ani okhanle Tithi, Mwaana, ni Erooho Yoowaarya, Matewu ohimmye-awe wira “mwaapatise ni Nsina na.” Moone, Nsina; kahi masina vano, okhala wira awo khakanle okhalaka masina, okhala wira khanivo nsina vo.

*Vano oyariwa wa Yesu Kristu wiireiye so: Okathi...
Maria maama awe aahakameliwa ni Yosefe, awo
ehinatthi okhala vamosa, owo aaphwanyaneya
orupanle ya Muluku Tithi. (Bibilia onnihimya yeeyo?
Bibilia onnihimya exeeni?)... owo aaphwanyaneya
orupanle ya Erooho Yoowarya.*

¹³⁹ Vano taani wa *yaala* okhanle Tithi Awe? Vano, Bibilia ohimmye wira *ola* ti Tithi Awe, ni Yesu ohimmye wira *ola* taari Tithi Awe. Vano, T’uvu okhanle Tithi Awe? Vano, vakhala wira Owo aarina axitiithi aili, vano sayi? Vakhala wira Owo aarina axitiithi aili, Owo mwaana ooraruiwa.

¹⁴⁰ Vano nrowe nisome-tho vakhani:

Vano Yosefe iy'awe, aari mutthu a exariya, khaatthuna omulaleya, masi aahuupuwela omuhiya ni mwiitiho.

Masi owo atthokelelaka itthu iya, vano, nlaikha n'Apwiya naahimukhumelela moolohani, niiraka, Yosefe, nyuwo mwaana a Davidi, muhoovelele omwaakhela Maria okhala mwaar'inyu: maana ole omurupanle-awe t'a... [Muthukumano onira, “Erooho Yoowaarya”—Mol.]

¹⁴¹ *Exeeni? Erooho Yoowaarya? Ahe, vanweryaneya sayi Atithi okhala Atithi Awe, ni Erooho Yoowaarya okhala Atithi Awe okathi mmosaru? Vano, Owo aarina axitiithi anli weeso, vakhala ti siiso. Nnari, mulopwana! Erooho Yoowaarya TI Muluku. Erooho Yoowaarya TI MULUKU. Tivo Muluku ni Erooho Yoowaarya ti Mutthu mmosaru, ahiiso Owo aarina axitiithi aili.*

¹⁴² *Moone, ninrowa osuwela taani okhanle Yohani ni Maria, oholo vakhani. Vaareera, hiyo naamoona vakhala wira Petru ni Matewu yaaphavela ovirikanya mmosa ni mukhwaawe wala nnari, noone vakhala wira Soolempwa sinnivirikanya. Iwo ohikhala mwiiwelo wa muroohnoni. Ti yeeyo.*

Masi owo atthokelelaka seiya...

¹⁴³ *Koosoma eyo, versiikulu 20. Vano 21:*

Ni owo onoomuyara mwaana,... (Mutthu ula, aari awani wa yaala? Mutthu mmosa, Muluku.) ... ni munrowa omwihana nsina nawe... (Exeeni?) [Muthukumano onnaakhula, “YESU”—Mol.] ... tthiri owo onoowoopola atthu awe mwa itampi saya.

... sothene iya sikhumelenle, wira... siiraneye saahimmyaaya Apwiya ni moolumo a profeta, wira,

Mwiiwe, mwali harusi onoorupala, amuyare mwaana, ni onrowa wiihaniwa nsina Nawe Emanuweli, ... nnihimya wira, Muluku ori ni hiyo.

¹⁴⁴ *Vano t'ani yaari Yohani ni Maria yaakhanle ehakalalaka murima mahiku othene? Aari pani Ole ohimmye wira, “Murowe, mwawiixuttihe attu a maloko othene, mwaapatisaka ni nsina n'Atithi, Mwaana, Erooho Yoowaarya”? T'ani aari Atithi? Nsina n'Atithi, Mwaana, Erooho Yoowaarya? [Ookhala oniira, “Yesu.”—Mol.] Vekeekhai, aari yoowo. Tthiri, kхиivo evirikanyelo wa yeeyo. Khiyaavo hata vakhaani. Eyo paahi enoolakiherya oratta-ene Yoolempwa. Owo aari Tithi, Mwaana, ni Erooho Yoowaarya. Muluku aari (Emanuweli) akhalaka ni hiyo, akhalaka mutapernaakulu mw'eruthunni eniihaniwa “Yesu.”*

¹⁴⁵ *Vano, mwiixitthiho wa unisista wa ekereja Unisista, vekeekhai kinnivirikanya ni yoowo, wuupuwela wira Yesu ti mmosa ntoko ekatha anyu ekhanle emosa. Owo aahaana okhalana tiithi. Owo ahaakhalanne, vaaweryaneya sayi Owo okhala tiithi Awe Yoowo? Nto vakhala wira Atithi Awe yaari*

mutthu ntoko ale a Oraaru anihimy'aya, vano Owo aayariwe eyareliwo yooraruwa ni axitiithi aili. Vano, moone, owanli munnivonya mwaha wo ovaanyihanaka. Munnona?

¹⁴⁶ Masi Ekeekhai aya t'ilä, wira Tithi, Mwaana, ni Erooho Yoowaarya, ti Omutthu mmosa. [Nipuro vahiitthu mufiitani—Mol.] . . . okhalaka mutapernakulu ya erutthu, wira okumihe etampi molumwenkuni. Eyo ekeekhaii voolikana, “Muluku ni hiyo.” Vano, tivo, okathi Matewu 28:19 . . .

¹⁴⁷ Vano, nyuwo mphavele Soolempwa, nto mwaaweryaka ophwanya vatthu mutthu mmosa mBibiliani . . . (Vano muupuwele yeeyo, vano muhihiye ela woovirani vasulu.) . . . vaavo mutthu mmosa mBibiliani otonko awe opatisiwa ni nsina “n’Atithi,” ni “Mwaana,” ni “Erooho Yoowaarya,” mutthikele wa miyo ni mukileele wira ka namirima miili, nto kinoohela nipawe ottuli waka kinimweetta mpooma mothene. Khekhanle mwa Soolempwa, okhuma Maphattuwelo mpakha Wiisuupulula. Masi khula mutthu mBibiliani aapatisiwe ni Nsina na Yesu Kristu!

¹⁴⁸ Nyuwo muniira, “Nwehererye minuutu mmosa, mulaleyi. Ankhi Yohani? Owo khaapatinse ni hata nsina!”

¹⁴⁹ Vaareera, ninrowa woona ethtu yaakhumelenle; nrowe nikhunle mwa—mwa—mwa Miteko, kapiitulu 19. Ti vaavo hiyo onaaphwanyaahu awiixutti a Yohani. Khula mutthu othene yaapatisiwa ni Nsina na Yesu Kristu, vano mpakha nimphwanyaahu nikhuru nla va. Miteko, kapiitulu 19. Nto nrowe nipacerye osoma vano, nto ninnaaphwanya awiixutti a Yohani:

Nto vaahiiraneya, . . . okathi Apolo (yoowo aari mulapeli, aarukunxale murima) waari—awe oKorinto, Paulo aahivira mmittettheni sa . . . wEfesu: aahaaphwanya awiixutti kamosa-kamosa, (awo yaari anammuthara Yesu)

¹⁵⁰ Nyuwo mwaweharu paahi ekapiitulu y’ottuli ehinatthi eyo, awo yaaviriha okathi muulupale mpakha awo yaakhuwelaaya n’utthapa. Akavi ansuwela wira eyo ekeekhaii? Nto Akila ni Prisila yaari vamuthukumanoni. Nto Paulo ni Sila yaahimaniwa ni okuphuliwa, khuheliwa mukhatteya. Eyo ekeekhaii? Nto awo yaahirwaasa va, khumphwanya Akila ni Prisila. Nto awo yaakkhalana muhakalaliho iwe ni mulaleyi mmosa muPatista, oniihaniwa Apolo, yoowo ooniherya ni Soolempwa wira “Yesu aari Kristu.” Vano Paulo khumphwanya:

. . . Paulo aahivira mmittettheni sa . . . wEfesu: . . . khwaaphwanya awiixutti kamosa-kamosa,

Owo aahahimeerya wira, Muhaakhela Erooho Yoowaarya okhuma okathi mwaaminni anyu? . . .

¹⁵¹ Vano, nyuwo mpatthani aka oophentiwa muPatista, vakhala wira eyo khemmana e—eyuupuwelo *anyu* ya teyoloxiiya, enihimya wira “muhaakhela Erooho Yoowaarya *okathi* mwaaminni *anyu*.”

¹⁵² Masi Paulo aatthuna waakoha aPatista ala, “Muhaakhela Erooho Yoowaarya *okhuma* *okathi* mwaaminni *anyu*?” Vano nwehe etthu yaahimmy’aya:

...Vano awo yaahimwiirela wira, *Hiyo*
khaniiwale...sinto yookhala Erooho Yoowaarya.

Vano owo aahaahimeerya, Ni exeeni... (vano,
mwaaththunaka woona tisiyonaariyu a Ekreku va,
onoowoonihani, “Mpatisiwe sayi?”)...*Mpatisiwe...ni*
exeeni? Vano awo yaahimuhimeerya wira, Ni opatiiso
wa Yohani nno. Yohani t’onipatinse.

¹⁵³ Vano kintthuna kikohe: Vaakhanle wira mwaarina opatiiso yoowo, mwaamukhala oosiveliwa ni yoowo? Mulopwana ene yoowo aamwaattamenle Yesu mmuro, khumpatisa Yesu Kristu, mulopwana yoowo aahaapatisa atthu ala. Owo opatiiso wooreera: kahi omiserya, kahi oyeeherya, masi opwiniha mmaasini mwa marove wa Yordani nipuro nenlo Yesu aapatisiwaawe. Nkuupuwelani yeeyo.

¹⁵⁴ Paulo khwira, “Muhaakhela Erooho Yoowaarya *okhuma* *okathi* mwaaminni *anyu*?” Awo...owo...

Awo khwira, “*Hiyo khaninsuwela...sinto yookhala Erooho Yoowaarya.*”

Owo khwira, “*Mpatisiwe sayi?*”

Awo khwira, “*Hiyo noopatisiwa.*”

“*Mpatisiwe sayi?*”

“*Wa Yohani!*”

¹⁵⁵ Vano nwehe etthu Paulo aahimmyaawe. Nwehe va:

Vano owo aahaahimeerya wira,...nyuwo mpa-... Wa
Yohani...Nto awo...

Vano nto Paulo aahihimya, Yohani vekeekhai
aapatisa... opa-...wo orukunxa murima,
aahimeeryaka...atthu wira, ...awo yaahaana
omwaamini ole aatthuna orwa, okhanle, omwaamini
Yesu Kristu.

¹⁵⁶ Moone, Yohani aapatisa paahi *mwaha* wo orukunuxa murima, masi opatiiso wa mmaasini ni Nsina na Yesu ti wo oleveleliwa itampi. Mukuttho khuwaaheliwe nlelo okathi uwo, itampi khisaaweryaneya oleveleliwa. Vano...Waari waakhula wa murima wooloka, ntoko siiriwaaya vathi va ikano. Luka 16:16, ohimmye wira, “Ikano ni maprofeta saahikhala mpakha Yohani, *okhuma* *okathi* yoowo Omwene onnilaleeriwa.” Vano nwehe. Nto...Nwehe.

Nto Paulo *khwira wa...*(vano nwehe)...*Nyuwo muhaakhela...*

¹⁵⁷ 5—versiikulu 5:

Nto *vaiwaly'aya yeela, yaahipatisiwa* (emaara ekina) *ni nsina na...* Yesu Kristu.

¹⁵⁸ Eyo ekeekhai? Vano atthu ala, atthu mwa Miteko 2, yaapatisiwe ni Nsina na Yesu. aYuta yaapatisiwe ni Nsina na Yesu. Amalapo yaapatisiwe ni Nsina na Yesu. Ni khula mutthu mBibiliani mothene yaapatisiwa ni Nsina na Yesu.

¹⁵⁹ Vano mphwanye nipuro nimosa mutthu mukina otonko awe opatisiwa enamuna ekina, nto miyo kinooththikela va kooniherye vatthu ekereja Katolika enkupali-aya, ni ohimya wira nyuwo munuuramela yeeyo. Nto khwira, "Siiso akhanlene maPrustante yooponwe okhala wira aakhalana miixuttiho vakhani sa Katolika, ntoko opatiiso ni nsina na 'Atithi, Mwaana, ni Erooho Yoowaarya'; wira ekereja Katolika yoowaarya yookhalana ehaakhi y'orukunxa ntittimiho wa Nsina na Yesu, okhala 'Tithi, Mwaana, ni Erooho Yoowaarya,' vano ekereja Prustante ennikupali." Ola nnari, miyo kinookhala ni Bibilia. Miyo kinimwaamini Bibilia.

¹⁶⁰ Nyuwo muniira, "Munna Branham, nyuwo munnaaruma atthu opatisiwa-tho?" Vekeekhai! Paulo oohimya va.

¹⁶¹ Vano nwehe, nrowe naakuxe aKalasiya 1:8, noone ethu Paulo ehimaly'awe:

...hata nikhalka hiyo, wala nlaikha ninkhuma wirimu, ninoolaleeryani ehapari ekina...nitakhaliwe.

¹⁶² Eyo eri vo, "Hata ti hiyo wala nlaikha." Ni Paulo, mutthu mmosaru, aahaaruma atthu wira epatisiwe-tho ale yaarina opatiiso wooreera ovikana ole murinaanyu, munn'aka; okhala wira Yohani Mpatisa aari munna awe Yesu Mwaneene, munna vaneili; aahimpatisa munn'awe omuro Yordani, vano owo khurukunuwa khwaapatisa awiixutti a Yohani. Nto Yesu khwira, "Owo khunrowa ovaru etthu!" ahioso Paulo khuhimya Yeeyo, khwaaruma wira epatisiwe-tho ni Nsina na Yesu Kristu awo ehinathi owerya waakhela Erooho Yoowaarya; vaamanly'aya okhuvwela ni omuttottopela Muluku ni oviriha okathi muulupale, okhalana mu—muhalalalih muulupale, ni wooniherya ni Bibilia (ni teyoloxiiya aya) wira Yesu aari Kristu. Akavi ansuwela wira eyo ti Yoolempwa? Ekapitulu 18. Vekeekhai ti siiso. Eyo eri vo. Vano kхиivo yookoha wa Yeeyo.

¹⁶³ Vano mukihiye koovaheni ehulelo yaamukhaani. Vano, owo khonakhumeleke ota wa yoorum, masi mwa Luka... Matewu, kapiitulu 16. Yesu, okathi akhuruwanse-aya vamwaako, Owo iirale, "Atthu aniira wira Miyo Mwaana a mutthu ki pani?"

¹⁶⁴ “Akina aniira wira Nyuwo mwa ‘Eliya,’ ni akina aniira wira Nyuwo mwa ‘maprofeta,’ nto akina aniira wira Nyuwo mwa ‘ela, ele.’”

¹⁶⁵ Owo khwira, “Masi nyuwo munihimya wira ki Pani?”

¹⁶⁶ Petru khwira, “Nyuwo mwa Kristu, Mwaana a Muluku mukumi.”

¹⁶⁷ Nwehe! “Ooreeriwa ti nyuwo, Simoni Par-yona (mwaana a Yona), erutthu n’iphome khewuupululenleni Ila.” Amen!

¹⁶⁸ Moone, Eyo ehaana orwa ni muupululo wa muroohoni. Erutthu n’iphome nnakhala khiyaamuleenle Apeli wira owo aahivonya (Kayini, wira owo aahivonya), khiyaamuleenle Apeli wira “Kayini aahivonya.” Masi Owo waari muupululo Apeli waarin’awe, “Yaari ephome!” Hiyo ninoophiyerya yookoha yeeyo muhina mwa minuutu vakhani. Yaari ephome, kahi mihokorokho, sinikuminhe hiyo omatta wEdeni. “Yaari ephome,” nto Apeli, ni muupululo wa muroohoni, aahuupululeliwa wa Muluku wira yaari ephome, nto owo, “Mwaha wo waamini,” aHeperi 11:1 anihimya wira, “owo ahinvalha Muluku mukuttho wooreeraxa onvikana Kayini. Yeeyo, Muluku aakupanli-awe mukuttho awe.” Eyo eri vo. Moone, owo aavanhe ni waamini, ni muupululo.

¹⁶⁹ Vano nwehe, “Erutthu n’iphome khewuupululenleni ila,” (ela yaahirowa mpakha okathi wa Pwiya Yesu) “masi Atithi Aka ari Wirimu t’awuupululenleni Yeela. Nto vamwala va (muupululo wa Yesu Kristu)... Vamwala va Miyo kinooteka-vo Ekereja Aka, nto mikhora sa mookhwaani khasinwerya oxintta Yeeyo.” Ti yeeyo Owo ohimmy’awe. Muupululo wa muroo-... “Nto Miyo kinihimya wira nyuwo mwa Petru, ni kinimoovahami ihulelo sa Momweneni. Nto sothene... Okhala wira nyuwo muhaakhela nlaka n’ovira na muroohoni nootthukuwa eriyari ya nno ni Wirimu. Erutthu n’iphome: nyuwo khimunatoko orowa oseminaariyu, nyuwo khimunatoko orowa oxikola, nyuwo khimunatoko okuxa e—e—esomelo ya teyoloxiiya. Masi mulipanne Muluku, nto Muluku khiwuupululelani Yeeyo, ni vekeekhai ti Soolempwa sitthukanaka emosa ni ekhwaaya. Miyo kinihimya wira nyuwo mwa Petru, ti yeeyo, ni Miyo kinimonyani ihulelo; nto ethu entthuk’anyu vathi va, Miyo kinoothuka Wirimu; ethu entaphul’anyu vathi va, Miyo kinootaphula Wirimu.”

¹⁷⁰ Nto Petru aari namaruuha moolumo Nihiku na Pentekosite, okathi othene yoovaaya olavula, owo aahilavula khwira, “Nyuwo atthu a oYuteya ni nyuwo munkhala oYerusalem, musuweleke ela ni mwiiwelele Masu aka. Atthu ala khahapaliwe ntoko sinuupuwelaanyu, okhala wira nlelo iwoora tthaaru sa voosiisu, masi ela t’ile yaahimmwe ni profeta Yoweli. ‘Enimwiiraneya mahiku ookiserya,’ onihimya ti Muluku, ‘Miyo kinimwaamwaraxela Erooho Aka atthu othene. An’inyu

alopwana ni athiyana anoolaleya s'eprofeta. Ni arumeyi Aka alopwana, ni axithiyana, Miyo kinimwaamwaraxela Erooho Aka. Ni kinimooniherya ithoonyeryo osulu wirimu ni elapo ya vathi, maripu a mwiixi nnikupetthe. Enimwiiraneya nihinatthi ophiya Nihiku nuulupale ni noowoopiha n'Apwiya, wira othene ale anrowa ovekela mwa Nsina n'Apwiya animoopowa.”” Eyo vo. Oh, wulu.

¹⁷¹ “Kimphavela woolelani vanci-ene mwaha wa tiithi ahu David,” owo khwira, “yoowo okhwiye khuvithiwa, nave mahiye awe ari ni hiyo mpakha olelo. Tivo, ory’ene profeta, owo aahoona...aahimoona Owo moono Awe woolopwana, ‘Ni Miyo nkinrowa ottikinyeya. Tivo erutthu Aka enoomumula okhala wira Awo khanihiya munepa Aka mookhwaani, nnakhala khamunrowa omuhiya Ole Owaarya Anyu wunnta.’”

¹⁷² “Vano Davidi ohookhwa,” owo khwira, “ni oovithiwa, nto mahiye awe ari ni hiyo olelo. Masi ory’ene profeta, owo aahoona khalayi ene orwa wa Naxariya, Yoowo Muluku omukhalinhe-awe Pwiya ni Kristu.” Oh, wulu. Vo ti vari Soolempwa sanyu. Vo ti vari ethtu ene. Ti yeeyo.

¹⁷³ Vano hiyo ninnoona va, nto, wira enamuna yoolikana, ni enamuna y’ekkekhai, ni enamuna emosa paahi etonko orummwa...Ni Petru aahikhala ihulelo, nto nihiku nlo okathi olaleiye awe, awo yiirale...Vano nwehe, ela ti Ekereja yoopacerya. Nyuwo aKatolika nwiriyane Ela. Nyuwo a Cambelliita nwiriyane Ela. Nyuwo aPatista ni aMetotista nwiriyane Ela. Ni nyuwo aPentekosite nwiriyane Ela. Ekereja ya Muluku, aNasareeno, Anawetta a Osantu, nwiriyane Ela.

¹⁷⁴ Petru aahikhala ihulelo, ni owo aahikhala ehaakhi, vaahikhale siiso Yesu oootha. Ni khivanweryaneya Owo wootha, “itthu piili sihinvirikanyeya, ti voohiweryaneya Muluku wootha.” Owo aahikhala ihulelo. Yesu aahimunnya ihulelo. Okathi Owo ohimunwaawe mmu—mmurottoni mwaya siiso, Owo aahikhala ihulelo sa mookhwaani ni, omooroni, masi kahi ihulelo sa Momweneni. Petru t’arina seijo! Eyo ekeekhai voolekana.

¹⁷⁵ Nto vano paasoopa, Petru, nyuwo mookhalana ihulelo siri mpararini mwanyu, ni munoolaleya. Yookoha enoorwa, atthu oorukunxa murima oopacerya a ekereja esya. Ekereja yoopacerya y’ekristu. Vano aKatolika, vano aPatista, aMetotista, aPrespiteriyaano, nyuwo muri mmwiixuttihoni Musya wa Ekereja? Musuwele vakhala wira mookhala.

...Alopwana ni axinna, niireke-ni?

...Petru khuvenya khwira... Murukunxe murima,...khula mmosa a nyuwo... (nkaweha, mmiravo; enamuna munihel’anyu ihulelo iyo va, Kristu onoohela siiso Wirimu)... Murukunxe murima, khula mmosa a nyuwo, mpatisiwe ni nsina na Yesu

Kristu... (ti siiso munvolowaanyu mwa Yeela) ... wira muleveleliwe itampi sanyu, nto munimwaakhela yoovaha ya Erooho Yoowaarya.

¹⁷⁶ Ihulelo sookela “saana” va, ni sookela “saana” Iwe. Mwaha wa yeeyo awiixutti a Yohani yaarinaaya orwa khupatisiwa-tho, emaara ekina, ni Nsina na Yesu Kristu (awo ehinatthi owerya orowa Wirimu), wira yaakhele Erooho Yoowaarya. Owo aahisuka Masu Awe. Tivo eyo khenoovirikanyani vano, kahi siiso? Munnona? Vekeekhai, Matewu 28:19 saari itiitulu, kahi Nsina.

¹⁷⁷ Vaareera, okathi xeeni-tho onihalenle? Ninoowerya okuxa-tho minuutu muloko ni mithanu wira kaakhule sookoha vakhani naakuvaka? Ninoowerya? Vaareera, ninrowa waakuva saana. Kookhalana piili vathi va voorkiserya, kaatthunaaka okuxa kaakuvaka, kitakanike ni ila, kawerya vale. Vano kinoowerya waakhula sikina saya Ttiminku voosiisu.

57. Kayini aari mwaana a enowa? (Ela ti yooreera.) Vakhala siiso, xeeni nto Hawa ahaarupanle-awe mpakha Atamu omusuwela?

Etthu emosaru... Yookoha enttharelana t'inamuna emosaru:

58. Waari mwi—mwiri w'ekekhai Hawa aalyiiye-awe muhokorokho aya? Owo aahoona wira waari wooreerela olya.

¹⁷⁸ Vaareera, munna mulopwana, muthiyana, onakhaleru pani, nrowe nitthikele mwa Maphattuwelo noone etthu va. Nirowe mwa Maphattuwelo 3:8, xontte. Vaareera, ni nwiriyane oratteene vano.

¹⁷⁹ Vano kinooruuha muupuxeryo ene. Sothene saari sooloka ni soowaarya, khinyaakhanle hata etampi wala soorava. Vano kinookuxa e...yaanyu...yookoha ela yoopacerya toko. Mwiri mwa ekumi...eriyari y'ematta, eriyari ya mwiri. *Mwiri* aari “muthiyana.” Vano kinoowooniheranyi yeeyo ni Soolempwa mwavilelaru paahi minuutu vakhani.

¹⁸⁰ Ninrowa woona toko vakhala wira owo aari...vakhala wira aarupanle ohinatthi omusuwela Atamu wala nnari, wala ohinatthi...Nwiriyane:

Vano awo yaahiiwa nsu na APWIYA Muluku yeettakasa mmatta, nto variiryale-ene oxekuwa: ni Atamu ni amwaar'awe yaahiiwiipitha APWIYA Muluku eriyari ya miri sa mmatta.

Nto APWIYA...yaahimwiitthana Atamu, khwira... Nyuwo muri woowi?

Nto owo khwira, kiiwale nsu nanyu mmatta, vano miyo kaahoova, okhala wira nkiwanre etthu;... (vano, owo khaasuwela eyo nihiku na nsana naya; etthu

yaahikhumelela, yookhala etthu yaamupululenle wira khaawanre etthu) *nto kiipitha*.

Vano awo khwira, Taani ooleenleni wira khimwaawanre etthu? Murimoolya muhokorokho wa mwiri, . . .?

¹⁸¹ Olya mwiri waahimusuweliha wira khaawanre etthu? Ntoko sinihimyak'aka imaara sinci-ene, (ela kehiyo eperwa, nkinihimya ela ntoko eperwa) "Masi vakhala wira okhuura masa onnaasuweliha athiyana wira khawanre etthu, vanreerela hiyo naavahe-tho masa." Munnona? Khiwaari ohwarz'etthu. Khiwaari mwiri, masa awo yaakhuunre-aya, yaari eyirelo ekhapa. Nwehe:

. . . Murimoolya muhokorokho wa mwiri, yoowo kaawiirenlakani wira muhilye?

Nto mulopwana aahaakhula wira, Muthiyana okivanhaanyu, okhala ni miyo, yoowo tokivanhe . . . mwiri, vano miyo kilya.

Nto Apwiya . . . yaahimwuirela muthiyana, Exeeni ila muviralyaanyu? Nto muthiyana khwira, Enowa tekootonthe, . . . (huh?) . . . Enowa tekootonthe, vano miyo kilya. (okathi munici-ene owo ohinatthi orupala, moone, ya Atamu)

¹⁸² Atamu aahimusuwela, vano owo aahirupala khimuyara—khimuyara Apeli.

¹⁸³ Masi kintthuna kookoheni, mwa moonelo mmosa paahi w'ekekhai. Vano wira kiwooniherenyi wira owo aari mwiri, khula muthiyana mwiri wa muhokorokho. Akavi ansuwela yeeyo? Nyuwo khamuhyo muhokorokho w'ame anyu? Vekeekhai, mwa yoowo. "Nto eriyari ya muhokorokho, wala eriyari ya mwiri, waari muhokorokho owo ahaakhanlyaaawe okwannyaka."

¹⁸⁴ Mwaweha vale, khaari Yesu Mwiri w'Ekumi? Owo khororomelinhe mwa Matewu Oowaarya, kiiroke, Yohani Oowaarya, kapiitulu 6, "Miyo ka Yolya y'Ekumi ehumme wa Muluku a Wirimu"?

¹⁸⁵ Mulopwana alya ya muthiyana . . . Nto nkawehani, oyariwa wa . . . ni muthiyana, hiyo othene ninnookhwa; okhala wira hiyo noolamuleliwa okhwa (eyo ekekhai?) mwaha wo oyariwa ni muthiyana. Mwaha w'oyariwa ni mulopwana, hiyo othene ninnikhala voohimala. Muthiyana mwiri wa mookhwaani, mulopwana ti mwiri wa ekumi; okhala wira muthiyana khorina hata ekumi mwa yoowo. Eyo ekekhai voolikana. E—eropo ya ekumi enkhuma mwa mulopwana, voolikana. Khunakela mwa muthiyana, nto muthiyana kahiyo etthu woohikhala mulipa-oowuuramela paahi; ni mwaana khonluttana, woohikhala ni mutekhu paahi. Khanivo hata nlepa na ephome ya maama

enkhala mwa mwaana; ooyariwa mphomeni mw'awe, masi woohikhala hata nlepa *mwa* mwaana. Murowe mwaphavele... wala mwasome eliivuru ya meetiku, wala mmukohé meetiku anyu, munoosuwela. Khanikhanle-vo, nnari, mulopwana, hata nlepa nnakhala. Muthiyana nooce paahi, ti yeeyo tu. Nto ekumi enikhuma wa mulopwana.

¹⁸⁶ Eyo ethoonyeryo yooreera wooniherya wira mwaha wa muthiyana, mwa oyariwa w'ephattu, hiyo othene nihaana okhwa, okhala wira hiyo na ookhwa opacerya wene; nto mwa Mulopwana paahi Kristu Yesu ninoowerya okhalana ekumi. Ni saahikhala miri miili omatta wEdeni. Khamunwerya woona?

¹⁸⁷ Nto nwehe! Nto nihiku nle aahikhala Kerupi mmosa wira olipeleleke mwiri ula. Wira awo yaalawinhe-ru Mwiri uwo wa Ekumi, awo othene yaamukhala voohimala. Akavi ansuwela yeeyo? Othene aya yaamukhala voohimala. Nto emaara yoopacerya awo yaakhanly'aya olawihaka... Nlaikha niirale, "Hiyo ninookhapelela Yoowo." Nto khuheliwa-wo aKerupi ni axoowa a mooro epantte ya onikhuma nsuwa wira elipeleleke Yoowo. Awo yaahitthikelasa Onikhuma nsuwa, khunakhapelela Mwiri uwo ni axoowa a mooro wira ale ehiwerye ophiyerya Yoowo (Mwiri yoola).

¹⁸⁸ Nto Yesu varwiyyaawe, Owo iirale, "Miyo ka Yoolya y'Ekumi, mutthu onlya Yoolya yeela khankhwaa." Owo vo Mwiri anyu.

¹⁸⁹ Owo vo muthiyana anyu, eyiirelo ekhana yeeyo enruuha okhwa. Vekekhai siiso ekhanlyaya ethunelo ekhana, wookhala okhwa onihiwa ni yeeyo. Ni siiso okhanlyaya oyariwa wa muroohni, yookhala Ekumi Ehinala onihiwa ni Yoowo. Okhwa orwiiye mwaha wooyariwa ni muthiyana, nto Ekumi erwiye mwaha wo oyariwa ni Mulopwana. Amen! Eyo eri vo.

¹⁹⁰ Vano nrowe nitthikele wa Kayini. Mwaamuwerya okileela vatthu erooho eyo ni otakhala murima iwo okhummyaaya-wo? Vakhala wira Kayini... nkawehani, vakhala wira Kayini aari mwaana a Atamu yoovo aari mwaana a Muluku, otakhala okhumme woowi? Etthu yoopacerya owo vayariwaawe, owo aaninyokha, owo aari namwiiva, owo aari neehace. Nto vano mukixe mukhalelo w'atiithi awe, waapacenryaawe wopaceryani, Lusifere, ni owo aari wopaceryani... owo aarina nríma mwaha wa Mikhayeli, yeeyo epacirinhe mulattu wothene. Akavi ansuwela yeeyo? Nto Kayini aari mukhalelo wa tiithi awe, yoovo owo aarinaawe nríma mwaha wa munnawee vano khumwiiva. Yooloka eyo... mukhalelo owo kхиwaakhhanle okhumaka wa epyo ela yooloka. Owo okhumme... waahaana okhuma w'epyoni yoohononeya. Nto nkanweheni Kayini, omalakaru oyariwa.

¹⁹¹ Vano nto Apeli aayariwe numala owo, vano owo aahirupala ya Atamu, ni owo aahisuwela—aahimusuwela nto owo

khimuyara mwaana Apeli. Nto Apeli aari ethoonyeryo ya Kristu; nto okathi—okathi Apeli oiviwaawe, Sethi aahikhala nipluro nawe; okhwa, ovithiwa, ni ohihimuwa wa Kristu, mwa nlikanyiho.

¹⁹² Masi, vano, Kayini aahikokhorela; miteko sawe sothene s'erutthu, vekekhai ntoko ekereja y'erutthu olelo: awo anniowa okereja, awo annikokhorela. Kayini aahikokhorela; owo khaari mutthu oohaamini, owo khaari komunista. Kayini aari mutthu oowaamini; owo aahirowa wa Muluku, aahimuteka altaari. Owo aahiira khula ethhu y'etiini Apeli aairaly'awe, masi khaarina muupululo wa muroohoni wa otthuna wa Muluku. Nittottopeliwe Nsina n'Apwiya! Eyo eri vo. Munnoona Yeeyo? Owo khaarina muupululo wa muroohoni, nto owo t'uri mulattu ni ekereja olelo. Nto Yesu ohimmye wira Owo aarowa oteka Ekereja Awe vasulu va muupululo yoowo wa muroohoni. Munnoona Yeeyo? Oh, wulu, maitho anyu anoowerya otthukuwa vano. Moone, muupululo wa muroohoni.

¹⁹³ Kayini aahirwa: owo aahimuteka altaari, aahikokhorela, aahiruuha mukuttho, aahikokhora, owo aahimuttottopela Muluku, owo aahimukokhorela Muluku, aahiira sothene s'etiini Apeli siiraly'awe. Nave Muluku aahimukhootta voomalela okhala wira owo khaarina muupululo wa muroohoni!

¹⁹⁴ Mutthare nlоко nenlo na Kayini: mutthare ovira mukalawani, okhuma mukalawani mpakhwa wIsarayeli, okhuma wIsarayeli mpakha wa Yesu, ni okhuma wa Yesu mpakha olelo; nto moone sinto ekereja eyo, ya erutthu yoolipiherya, yoowuma murima ni yookhaleleya, ya exikola, miyo kinaahimya atthu arina Soolempwa, yaawo ansuwela mwiixuttiho wothene ni ateyoloxiyya, awo anniwerya otaphulela, mmiravo, *siiso*, masi oohikhala muupululo wa muroohoni! [Munna Branham oruminhe ikatha sawe—Mol.] Ti yeeyo. Owo mwiixuttiho wa Kayini.

¹⁹⁵ Bibilia ohimmye wira, “Aatakhaliwa awo! okhala wira atthanre mwiixuttiho wa Kayini, attharelela ivonyeryo sa Palaamu, khupweteya moovaanyihanani mwa Kore.” Eliivuru emosaru, Yuta, owo ohimmye wira, “Awo aathomeliwa ehukhumu yeela.” Vekekhai, awo aathomeliwa. Munnona? Exeeni aari Palaamu? Owo aari pixipu. Owo aari vasulu va ekereja yothene. Owo aarwiye mwa voophaveleya vale paahi ntoko saawery'awe okhala. Owo aahivaha...Nkanweheni owo eemenle-ene iwe ni atthu oottottopeliwa, eemenle-ene iwe atthu aya aalupale oottottopeliwa. Ni awo khayaari atthu oohaamini, awo yaari oowaamini.

¹⁹⁶ Nle—nihimo nle na Mowabi naakhumme wa mwaana muthiyana a Lothi. Lothi yoowo aakhanle...Mwaana muthiyana a Lothi yoowo aakhanle n'atiithi awe, khurupala khimuyara mwaana, nto mwaana owo aari...khikhumelela

nihimo na Mowabi. Nto awo yaari muromolelo muulupale. Atthu, aalupale a maluwa, ni yaahikhalana akhulupale ni mamwene ni oottottopeliwa. Awo yaahikhalana mapixipu ni makarteyaale n'ithtu sothene.

¹⁹⁷ Nto va ninrwa nikhuru na masantu oophirikeya, nikhuru nikina, Isarayeli; nikhuru naamukhaani nahaari muromolelo, eriyari ya miromoleleo. Ni yaahiira soonanara sothene mwaakhanlyanya wuupuwelaka, nave. Masi ele yaari, awo yaahikhalana muupululo wa muroohoni, ni Muluku aari ni yaawo Munripuni na Mooro.

¹⁹⁸ Oh, miyo—miyo koosuwela wira awo yaahikhalana itthu sa mw'erutthuni, nto atthu khwira, "Nikhuru n'atthu oohiya waamini ntoko nle, kхиivo hata ethu yo wira ohikhanle owoomola paahi." Masi awo yaahikhalanasa muupululo wa muroohoni, ni yaahikhalana Mwala woovulalihwa, awo yaahikhalana enowa y'eporonse, awo yaahikhalanasa Nripu na Mooro naarowa ni yaawo. Aleluya! Koosuwela wira nyuwo—nyuwo munoona wira kirootannyeya, masi nnari. Kinoona oreera paahi.

¹⁹⁹ Nwehe! Kuupuwelaka wira, "Muluku yoowo mmosaru, olelo, onkhala ni hiyo." Owo nlelo muupululo wa muroohoni wa Masu. Vekeekhai, ti yoowo. Ti woolikana Voohimala. Nittottopeliwe Nsina n'Apwiya! Ayo, mulopwana.

²⁰⁰ Va aaphwanyaneya yoowo osulu iwe, a soophaveleya; nikhuru nle na aPatista ni maPrespiteriyaano khweemela vamwaako, yaahikhalana pixipu aya weiwe. Ni awo yaari anatiini, ni enamuna emosaru y'etiini, awo yaamukokhorela Muluku mmosaru. Awo khwira, "Nkaweha vathi vale nikuththa nle na ikokhola. Vano, awo kharina hata muromolelo. Awo kahiyo hat'ethu woohikhala nikhuru na manyakunyaku, ookhuwelasa, masantu oophirikeya."

²⁰¹ Eyo ekekhai? Vekeekhai, yaari yeeyo. Nyuwo mwaahaaminiki wira yaari masantu oophirikeya, mutthikele mwa Maphattuwelo musuwele okathi yaalapuwansonse-aya. Nto mwiiriirywa waahipakiwa, vano Miriyamu khukuxa ekoma khurowa okerekhere wa ephareya, oopaka; ainaka Muroohoni, ni Moise aahiipa Muroohoni. Nlo naahikhale nikhuru na ele eniihanaahu ootaphuwa...masantu oophirikeya, nkisuwenle exeeni iyo; yiipaka ni etuphaka ni ettottopelaka. Nto okathi wothene maloko yaanaanyokha, masi Muluku aari ni yaawo. Awo yaarina muupululo wa muroohoni, yaathara Nripu nle na Mooro.

²⁰² Nto Mowabi khwira, "Vano, nkawehani va. Hiyo ninrowa owiihana makarteyaale othene ni mapixipu othene, ni mahumu othene, nto naaruuhe va. Nnimwiira ethu ni yeeyo, okhala wira hiyo na elapo y'etiini. Khaninrowa

ohiyererya emwaramwareyelo ele otakanxana ni muromolelo ahu wooreera.”

²⁰³ Vano tivo yaahiitthaniwa vale. Ni yaahaateka altaari muloko nanli; ti yeeyo Isarayeli aarin’awe, altaari muloko nanli. Yaahihela mikuttho muloko ni miili vaavo, amwaanyompe; voolikana siiso yeeyo Isarayeli aarin’awe, etthu Muluku aavekenly’awe. Awo yaahihela ipwittipwithi muloko ni piili vaavo, saathoonyerya orwa wa Pwiya Yesu Kristu; ipwittipwithi muloko ni piili mapuro oomanli.

²⁰⁴ Ale oottottopeliwa othene, mapixipu ni othene, yaaheemela erukurenrye. Awo yaahipaha mukuttho. Yaahivekela, yaahinvenxerya matata aya Yehova khwira, “Yehova, muniwie!” Awo yeererya wira exeeni? Ni Palaamu aya mutokweene aahikhuma siiso, vano Erooho khimukhuruwela. Vekeekhai (masi owo aari a mw’erutthuni).

²⁰⁵ Erooho pooti ommorela namirima miili, Bibilia oohimya. Nyuwo mookiiwa miyo wiixuttiha yeeyo, vano. “Epula ennimurupela naxariya ni ootakhala.” Masi ehaana olikan ni Masu, ti vaavo munikhalaanya.

²⁰⁶ Vano owo vairaly’awe siiso, ni e...okathi Erooho, nnakhala vo, mwa yoowo yaahimya Ekeekhail, owo aaheererya omutakhaliha Isarayeli, nave aahimureeriha Isarayeli.

²⁰⁷ Vano, vakhala wira Muluku ontittimiha ekereja yooreera, ni pixipu ooreera murima, ni pastore oophwanelaxa, nikhuru n’atthu a exikola, Owo aahaana okupali mukuttho ole, okhala wira owo aari oratte-ene voophaveleya ntoko Isarayeli saaryaaawe; masi owo khaarina muupululo wa muroohnoni wa Masu ni otthuna wa Muluku. Eyo eri vo, eyo t’envirikana olelo.

²⁰⁸ Nkanweheni Yesu. Awo yiirale, “Khinimmuthuna mmiravo owo. Hiyo noosuwela wira owo muSamariya. Owo mulolo. Nyuwo munooniixuttiha hiyo? Ahe, nyuwo tuyariwe mooraruwani. Nyuwo khimuhayo hat’etthu woohikhala mwaana ooraruuiwa oorwa-no. Atithi anyu taani? Muniira Muluku ti tiithi anyu, nyuwo mwa namaveeha! Vano, munthuna onileela? Hiyo ninnikhala alaleyi, hiyo ninnikhala pixipu; okhuma axipwaapu, axipwaapu, axipwaapu, axipwaapu, axipwaapu, axipwaapu aya axipwaapu ahu yaari alaleyi ni mapixipu. Hiyo tuyariwe ni nileliwe mukereja. Hiyo noovira iseminaariyu soosuweleyaxa. Hiyo ninnisuwela khula Masu ni oratta-ene. Nto nyuwo mumphavela oniixuttiha? Exikola xeeni mutonko anyu orowa? Mphwannye vayi wiixutta nno?”

²⁰⁹ Owo khwira, “Nyuwo mwa a...atiith’inyu xetwani,” Yesu khuhimya.

²¹⁰ Awo khiyaarina hata ithoonyeryo ni mitikiniho eriyari aya. Awo khiyaarina ovoniha wa Muluku ni itthu eriyari aya. Awo khiyaarina iparakha eriyari aya. Masi Yesu aari vekeekhai muupululo wa erooho wa Soolempwa.

²¹¹ Awo khwira, “Vano, yoolempwa *elexe ni lexe.*”

²¹² Nto Yesu khwira, “Ayo, ni yoolempwa-tho.” Masi Muluku aanimulupiherya mutthu Awe ni ithoonyeryo sawe.

²¹³ Petru aahimmye ethu emosaru, mwa Miteko 2, owo iirale, “Nyuwo atthu Isarayeli; Yesu a oNasareti, Mutthu aakupaliwe ni Muluku eriyari anyu, ni ithoonyeryo ni mitikiniho seiyo Muluku siiraly’awe mwa Yoowo eriyari anyu, ni nyuwo othene musuwenlyaanu.” (eyo eri vo) “Owo ovaherereriwe-ene wa . . . ni fore- . . . Akhulupale a oSineetriyu yuulupale iwe. Masi mwaha wa osuwela wa Muluku khalayi ene, Muluku omuthomenle-ene wira Owo akhwe ekhwelo yeela. Nyuwo moonvahererya ni matata oonanara ni ootakhala. Nyuwo moomukhomela Mwaneene Ekumi, Yoowo Muluku omuhihimuxaly’awe. Ni hiyo n'anamoonaa.”

²¹⁴ Whish, mulaleyi xeeni! Owo khaa . . . owo khaawerya hata olepa nsina nawe, masi aanimusuwela Muluku. Awo yiirale “yaahinwiriyana owo okhala wira aahetta ni Yesu.” Vekeekhai, owo muupululo wa muroohoni. Oh, wulu. Vano, eyo eri vo.

²¹⁵ Kayini aari ni mweettelo yoowo, ekereja ele ya erutthu eri ni mweettelo mmosaru olelo. Ekereja ya Erooho nlelo yookhalana Nripu na Mooroo, nlelo yookhalana ithoonyeryo, mitikiniho, nlelo yookhalana Kristu mmosaru; yoowo onlipiherya sothene okhuma okhwa wa mwaapwittipwitthi, ni omatta wEdeni, mpakha Orwa wa neili wa Mwaapwittipwitthi. Vekeekhai, mmosaru nsana, olelo, ni mahiku othene.

²¹⁶ Ni nloko nle na Kayini, na etiini ni ookutthiwa ni oosoma, kweekwe nimosaru; nimosaru paahi, khula nihiku nimosaru. Oowuulumela ni anamalupatha, ntoko Kayini saaryaawe ni Apeli, awo ti siiso olelo, annikhalaka ni kweekwe anoorowa okhala; a mw'erutthuni, oohaamini. Ti yeeyo.

²¹⁷ Vano Maphattuwelo 3:8, ni nave-tho kihaacererya 20 va, kaaweha yeeyo okathi vakhani:

*Nto Atamu aahinvaha nsina . . . Nto Atamu aahinvaha
nsina mwaarawe . . . Hawa; okhala wira owo aari
maama a othene arina ekumi.* (moone, eyo yaari
nuumala wootothiwa nno wiiraneya)

²¹⁸ Kayini aari . . . “Vano mulipelele!” Nyuwo muniira, “Vaaweryaneya sayi evili, enowa?”

²¹⁹ Masi, munna, nwehe va, Bibilia khonihimya wira owo aari enowa; Bibilia ohimmye wira, “Owo aari ootepaxa olavilavi ovikana inama sothene sa mutakhwani.” Owo khaipurulaka, aari mwaaxinama. Owo aari e . . . Ni vale . . .

²²⁰ Nto mukihiye paahi koovaheni ila ntoko ekanyeryo yaamukhaani eriyari ya hiyo, mwatthuna vale. Ti vaavo siyensiya otepanyeiyaawe othene. Etthu yoolikanexa awo anwery’aya ophwanya ni mutthu, ti khole. Akavi ansuwela yeeyo? Masi

yookhala etthu eriyari vo. Awo khanwerya okhaliha makhuva a khole olikanana ni makhuva a mutthu, onaamwi ori etthu yoolikanexa. Awo anoowerya woona epacerelo ya munnuweloa wa mutthu mwa naarokhinya. Awo anoowerya omutthara mwa naarokhinya. Anoowerya otthara munnuweloa wa mutthu mpakha mwaaxinama ni khula mwaaxinama. Anoowerya omutthara mwa ekhaya. Nyuwo mukuxe ekhaya mukumihe esapala aya, enkhala ntoko mwamuthiyana. Etthu emosaru paahi. Mukuxe ettuli awe n'itthu sothene, mwaakhalihe vamosa, mmweemexe muthiyana siiso...mmukhalihe muthiyana siiso. Onoolikana siiso ntoko e—ntoko e—ntoko ekhaya. Nnawu ninoolikana siiso, ni ntata ninoolikana siiso, vekeekhai ntoko mutthu. Masi khole onootepa olikanaxa ovikana eyo. Onihala vakhani, masi awo khanwerya ophwanya.

²²¹ Va yookhala esiiri yaamukhaani, mwatthuna vale osuwela. Moosuwela vary'aya? Awo arimwiipithiheriwa. Awo pooti othipula makhuva othene awo antthunaaya. Awo pooti othipula... Alipa oothipa pooti othipula, ni siyensiya, ni a—ni alipa-oowaalikela okathi pooti ophima miphimo sa okathi ni iphimelo sa aatomu, masi khankhalakhala ephwanyaka. Maana eyo yaari enowa yaari ntoko mutthu ovikana etthu p'itthu ekina yaakhanle mulaponi, nto Muluku khimutakhalihha khimukhalihha aipurulaka ni erukulu awe, nto khutatuxiwa okhala enowa ehnلالا hata vakhani ni mutthu. Vano musune muru anyu, anasiyensiya awo, mwaahiye yuupuwele yeeyo okathi vakhani.

²²² Masi Bibilia onnihimya wira, “Owo aari ootepaxa olavilavi ovikana inama sothene sa mutakhwani.” Ti yeeyo. Owo aari nolutte nenlo niri eriyari ya mutthu ni khole, nto Muluku khimutakhalihha khimukhalihha aipurulaka ni erukulu awe mwaha wa e—wa etthu aairalyaaawe. Owo aaroomoototha muthiyan’ola, nto owo khimuyara mwan’awe mwamulopwana oopacerya yoowo aari Kayini, yoowo orina mukhalelo w'enowa mwa muupuxeryo, xetwani, aakenle mweenowani, toirale eyo.

²²³ Vano nto owo aahirupala khuyara, aahirupala-tho nuumala wootothiwa. Vano nwehe, owo aahootothiwa, owo aahalela... Ahe, owo aahiira yoonanara. Masi owo, vekeekhai, voophwanela okathi owo aarupanlyaawe ya aiy'awe, khino eyo pooti yaakhanle sinci-ene, okathi munci-ene, miyeeri sinci-ene ni mahiku manci-ene nuumala eyo; khivanweryaneyea osuwela, khanisuwenle, masi owo aahimuyara mwaana a Atamu.

²²⁴ Ni ookhala mutthu aarina yookhala, wira, “Ahe, mwaana... owo ohimmye wira aarowa... Vayariwaawe Kayini, owo iirale ‘aahikhala mwaana okhuma wa Apwiya.’” Vekeekhai, voolikana, yaahaana okhala. Yaari ekano ya ephattu. Vekeekhai ti siiso mury'anyu olelo. Okathi oniyariw'anyu, Muluku khonkhuruwa paahi khunoopakani. Nyuwo mwa yoophuwa ya atiithi anyu ni ame anyu. Ni munookhala mu...onookhala

e... an'inyu anrowa okhala yoophuwa anyu. Eyo eyarelo okathi wothene, erowaka vookhuruwela, ntoko enuku ya miri ni itthu siiso; masi ethikelaka ele yoopacerya. Kinroromela wira eyo enniliakiherya.

²²⁵ Okathi xeeni onihalenle? Khanirina-tho. Nwiriyane ela yooreera entharelana... enrowaaahu waakhula Ttiminku: “Mwa Erooho emosaru hiyo othene noopatisiwa mw’Erutthu emosaru...” (Naatthuna osuwela yeeyo.) “...Kristu.” Okathi... Vano, kinoona wira kinookelela Soolempwa kamosakamosa, Soolempwa sooreera sa yeeyo [Munna Branham onnaakhula yeela Mpantte II, yookoha 60—Mol.].

²²⁶ Va yookhala emosa yooreera, ntoko paahi... Mwaamuwerya okivilela minuutu mmosa wala miili, wira kaakhule ela? Eyo enniwerya wiisaakhula.

59. Mwa—mwaahimyaka wira “mutakhali khonrowa opaheya Voohimala,”... (Ahe, vano kihaana Anamoona a Yehova mmutekoni, kahi siiso?) ...**Mwaahimyaka wira mutakhali khonrowa opaheya Voohimala, munihimya omooroni wala ontthiyani wa mooro?** Koosuwela wira ennihimya mwa Wiisuupulula (eyo ekapiitulu 20) wira omooroni onooriheliwa ontthiyani wa mooro. Vakhala wira awo khampaheya Voohimala, nto anrowa okhala exeeni?

²²⁷ Ntoko simanly’aka ohimya, munna mulopwana wala muthiyana, onakhaleru pani; awo anoomalamala, khenihala etthu ya yaawo. Awo yaahikhala epacerelo, nto awo anoomala; awo khahiy-tho etthu. Enrowa sayi...okathi xeeni awo anrowaya opahiwa, eyo ti yoorika ohimya. Masi, nkawehani, vo...

²²⁸ Nyuwo mwaweryaru paahi ovara ela mmuupuwelomi mwanyu, moone, ti yookhweyaxa. Ori muthinto mmosa wa Ekumi Ehinimala, nto eyo enkhuma wa Muluku Mwaneene. Ni Muluku paahi ti Ekumi Ehinimala. Nyuwo mwaphavela va muleeksiku ya ekreku, nwehe nuulumo n’Ekereku Zoe. Zoe ti “Ekumi Ehinimala.” Ekumi Ehinimala ti “Muluku.” Nto Yesu ohimmye wira, “Miyo kinnaavaha Ekumi Ehinimala.” Nto nyuwo mwaweha va tisiyonaariyu a ekreku, owo ohimmye wira, “Zoe.” Eyo ti Ekumi Ehinimala emosa paahi ekhanle. Khanivo hata nipuro mBibiliani vaavo Nlo nnihimy’aya wira onookhala omooroni Ohinimala, ehimmye wira anoopaheya “mahiku othene ni othene.”

²²⁹ Vano, mukuxe nuulumo *mahiku othene*, nwehe, *eyoni*. Mooweha *va*, mBibiliani? Akavi atonko wiwa ehimmye wira, “Ni eyoni ni ey...”? Akavi ansuwela wira *eyoni* ti “evirelo y’okathi”? Vano, vekeekhai, khula mutthu onnisuwela wira *eyoni* ti “evirelo y’okathi.”

²³⁰ “Vano awo anoopahiwa mwa iyoni,” eyo evirelo y’okathi. “Anooriheliwa ontthiyani na mooro, nto anoopahiwa mwa

iyoni.” *Eyoni* enihimya “evirelo y’okathi.” Awo pooti opahiwa miyaakha imilyawu emiya muhukhumuni masi, vookliserya, ahaana ophiya woomalelani; wira emalamale, mara. Moone, okhala wira sothene sihikhanle sooloka ti ohononiwa wa ele Yooloka; ni yaahikhalaana epacerelo, tivo ehaana okhalana emalelo.

²³¹ Masi hiyo nimmwaamini Pwiya Yesu Kristu nookhalana *Zoe*, “Ekumi ya Muluku Mwaneene” mwa hiyo, ni nookhalana Ekumi Ehinimala. Kahi okhalana ekumi mahiku othene ni mahiku othene, natampi ookhalana ekumi mahiku othene ni mahiku othene, masi hiyo nirina “Ekumi Ehinimala.”

²³² Munna Cox, woohikhala khalayi, aakilaanthe waattamelia vamukhura vaka nihinatthi ohela e...vaamanlyaaahu okhalana maluku vaavale, vano owo khuttotta nikhowa noothipuwa naamukhaani, na khalayi, nto owo khwira, “Munna Branham, nirina miyaakha mikavi nlo?”

²³³ “Oh,” miyo khwira, “vo waalikela okathi, nyuwo mwaamuweria ohimya wira miyaakha ikonto muloko. Muthinto mmosa, wa yootikiniha yaamukhaani ya mphareya yaakkhalaka okathi ule, mwaamunama mwaamukhaani a mphareya, khino otonko okhala wu okathi ule wa khalayi.”

²³⁴ Owo khwira, “Muupuwele paahi moota ekumi ya mutthu ery’aya yookhuveya naalikanyihaka ni ekumi *ile*.”

²³⁵ Miyo khwira, “Oh, masi, munna, etthu iyo yookhalana emalelo, masi Ekumi hiyo erin’ahu mwa Kristu kherima emalelo. Eyo khino siiso ekhanle-ene *mahiku othene* vaili wala vararu, masi khenkhalkhala ekhalanaka Ekumi Ehinimala, okhala wira Ekumi Ehinimala enkhuma wa Muluku paahi.”

²³⁶ Ehinimala, “Ole oniiwa Masu Aka ni onimwaamini Ole okirumme, ookhalana Ekumi Ehinimala ni KHONROWA olamuliwa masi oovira mookhwaani khuphwanya Ekumi.” Eyo eri vo, nyuwo munikhalana Ekumi Ehinimala mwaha w’okhala mulipa-oowaamini. Ole ooħħamini ookhalana ekumi mahiku othene. Ehinimala...mulipa-oowaamini orina Ekumi Ehinimala, ni khokhanle oopweteyaka okhala wira Eyo ti Yoohimala.

²³⁷ Masi mulipa-oowaamini, owo onoorowa...Ole ooħħamini onoovira mulaponi, onookhalana iħaawelo, otakhaliwa; etthu owo oniħħanaawe oviriha okathi muulupale, “uuuwii, oviriha okathi muulupale.” Athiyana, eviinyu, ni okathi muulupale, owo onuupuwela wira khommala. Owo onimookhwa, ni onoorowa ontthiyani na mooro ni esoofiri sivvarela, weiwo opaheya onkhalaaya mahiku othene ni mahiku othene, ni khino mwa miyaakha imilyawu emiya munepa awe onoħħaaxiwa ontthiyani na mooro ni esoofiri.

²³⁸ Miyo...Nyuwo muniira, “Enrowa okhala ntoko mooro wa esoofiri voolimaleleya?” Kookupali wira onrowa okhala

wootepaxa vaara emilyawu ovikana yeeyo. Kookupali wira khimwaarowa owerya ohimya ntoko mooro, ni mooro ene. Enamuna emosa paahi onlikanihiwaaya “ni mooro,” okhala wira mooro ti ethu enihononaxa erinaahu. Owo onnipaha ni opwetexa sothene mara, mooro onniira. Ahe, nto, onrowa okhala mwemmo, masi munookhalana munepa onrowa ohukhummwa mwa enamuna emosa . . .

²³⁹ Vano, muhaana oweha nuulumo *mooro*, okhala wira Erooho Yoowaarya enniimmwa “Erooho Yoowaarya ni mooro”; okhala wira mooro wa Erooho Yoowaarya onnipaha etampi, moone, n’ukhalihia vooreerela.

²⁴⁰ Masi mooro *ola*, onkhuma omooroni, ehimmye wira “ontthiyani na mooro.” Nto enakhaleru exeeni, eyo ehukhumu ni ohaaxiwa. Mulopwana thaaciri aahivenxa maitho awe, oryeene omooroni, *khwira*, “Mmurume Lasaro ni maasi vakhaani mukathani mw’awe, wira ahele vayanoni vaka, maana malumi a mooro ala anookihooxa.” Muhuupuwelle wira khokhanle omooroni onvarela, ni omooroni w’ekekhai, wookhala. Vakhala wira ookhala xetwani eekekhai, wookhala omooroni w’ekekhai.

²⁴¹ Masi, moone, sothene sihononiwe sookhalana emalelo aya, okhala wira voorkiserya ehaana otthikela oloka iwe ni waaryya wa Muluku. Ni Muluku ti Oohimala; ni hiyo nakhalanaru Ekumi Ehinalima, Muluku ori mwa hiyo, nto hiyo khanikhanle-tho okhwaaka siiso Muluku ohinikhw’awe. Eyo eri vo.

²⁴² Vano, yookoha vekekhai enniitaphulela Mmansaya, moone, ni ti yoolikana. Vano, nrowe noone, kaahikhala e . . . Nkisuwenle sinto . . . Ayo:

“Exeeni—exeeni enrowa okhala wa yaawo?”

²⁴³ Awo anoomalamala, khankhala-tho: munepa onoomalamala, erooho enoomalamala, ekumi enoomalamala, erutthu enoomalamala, miyuupuwelo sinoomalamala, eyuupuxeryo enoomalamala.

²⁴⁴ Nto khasinrowa-tho okhala miyuupuwelo sootakhala, wala ntoko wira, khinatoko okhumelela, Movuwani. Ti yeeyo, sothene sinrowa okhala . . . Mwaamuwerya otthokelela, wira va yaamurowa okhala atthu epantt’ila nno . . . ?

²⁴⁵ Bibilia khohimmye wira, “Hata miyuupuwelo sa mutakhali sinoopweteya”? Miyuupuwelo sene sa yeeyo sinoopweteya.

²⁴⁶ Vaarowa oweryaneya sayi okhala mutthu *va*, Muluku Ole Muulupale Oowaarya *va*, ni osuwelaka wira ottaiwene iwe yookhala ehimye ni minepa sipaheyaka mwemmo? Vano, iwo khiwaakhanle okhalaka Wirimu. Miyuupuwelo sene, muupuxeryo ene, itthu sothene sihononiwe, khula muupuwelo wootakhala, sothene sinoopweteya, ni itthu sothene sirina sootakhala. Ni hiyo khaninrowa okhala etthu ekina woohikhala

oloka voomalela, ni *Zoe*, Ekumi ya Muluku; wa Ehimalelo, ni wa wakathi sinoovira, siviraka, siviraka, siviraka, siviraka; Khenrowa omala, enrowa okhala Yoohimala!

²⁴⁷ “Awo yaahikela muhukhumu wa *mahiku othene*, masi anaxariya yaahikela mw’Ekumini Ehinimala.” Munniwiwa? Ehukhumu ya *mahiku othene*, Ekumi Ehinimala, evirikanelo xeeni!

²⁴⁸ Vano, moone, eyo kheni...Vano, miyo koosuwela, wa nyuwo, aximiravo aka oophentiwa, miyo—miyo nkineererya wiisooniherya ntoko namasuwela sothene. Kaairaka siiso,...

²⁴⁹ Vano, kihaana-tho sookoha thaaru wala xexe sooreera. Ninoolavula Ttiminku voosiisu, Apwiya yathuna vale.

²⁵⁰ Vano, nkawehani. Moone, iya sinnikhumeleliha sookoha. Miyo ka mulaleyi mutokweene. Miyo—miyo—miyo—miyo kihaana miyaakha miloko miili ni mithanu na mosa mmutekoni. Nto miyo—miyo kinnixukhuru vanci-ene mwaha wa yeela, kinweryaaka ohimya ela, yawaka...Miyo nkinaphaveleke weererya wooniherya etthu p’ithu mmakhaleloni mwaka ehitonko wuupululiwa. Ni nkireere oxukhuru wira Nlaikha n’Apwiya...Siiso kihisomme aka, nnakhala erattelo. Nto Nlaikha nla naahikhuruwa, ni ninnikhala mukhaliheryo aka oveleelihiwe okhuma wa Muluku. Ni Owo khonakihimeeryeke etthu ehinakhaleke yoolikana okhuma Maphattuwelo mpakha Wiisuupulula, siiso mpakha...Miyo kaahilepa naanaanoru okathi Owo iiraly’awe “Nto nyuwo—nto nyuwo munimwaakhela yoovaha ya ovoniha wa Muluku.” Nto miyo khulepa siiso ntoko Owo saahimme awe.

²⁵¹ Nto miyaakha soophiyaka miraru ohoolo waya, mulipaooweettiherya mutesko khuki—khukikasoopa wa yeeyo, khwira, “Munna Branham, mooweha yeeyo? Eyo ti yoolikana saana mpakha Owo ooleenlyaaaweni ‘yoovaha emosa.’”

²⁵² Moone, khonahimyeke wira “yoovaha.” Ni khula—khula mmosa mBibiliani...khula yoovaha ti “yoovaha” masi ovoniha wa Muluku, ni ti “yoovaha emosa.” Ti “soovaha sa ovoniha.” Nyuwo munooewerya okhalana inamuna sothene sa soovaha sa ovoniha, inamuna soohiyana-hiyana. Masi, khula emosa wa soovaha sikina ti “yoovaha”: “yoovaha” y’eprofeta, “yoovaha” ya *ela*. Masi ovoniha wa Muluku ori mwa sinci-ene: “soovaha.” Ni nkinatoko oweha saana yeeyo, wira Erooho Yoowaarya ti yooloka saana. Oh, attottopeliwe Apwiya!

²⁵³ Munnisuwela saana wira Erooho Yoowaarya emosaru emulempe Bibilia owo, ni axilopwana imiya sene, miyaakha imiya sene voorakamelana...ni khaavo hata mmosa wa awo ovirikanyanne mmosa ni mukina, khula mmosa a awo aari oomalela; ni khaavo hata mmosa aamwiiwale mukina.

²⁵⁴ Nto Paulo aahirowa, ni aari wArapiya, ni khaatonko othotola oYerusalem mwa miyaakha muloko ni mixexe,

masi aari oYerusalem ni o...aakhumme...khaatonko orowa oYerusalem. Masi wArapiya, nto khupacerya olaleya, aaira ohinatoko omoona Petru ni akina wa miyaakha muloko ni mixexe. Nto vakumananse aya, awo yaanilaleya ethhu emosaru: opatiiso wa mmaasini ni Nsina na Yesu Kristu, ni ovoniha wa Muluku, ni owerya wa Muluku.

Oh!

Kinnithapa ohimyaka wira ka mmosa a
yaawo.

Mmosa a yaawo, ka mmosa a yaawo,
Kinnithapa ohimyaka wira ka mmosa a
yaawo; (Aleluya!)

Mmosa a yaawo, ka mmosa a yaawo,
Kinnithapaxa ohimyaka wira ka mmosa a
yaawo.

Aakhala atthu ntoko mapuro othene,
Murima aya onvarela,
Ni Mooro ola waamorre oPentekositeni,
Waawuukunte ni waareeriha;
Oh, Owo onovarela vano mmurimani mwaka,
Oh, nivuwihiwe Nsina Nawe!

Kinnithapa ohimyaka wira ka mmosa a
yaawo.

Yaathukumanne empa y'osulu,
Othene evekelaka mwa Nsina Nawe,
Awo yaapatisiwe ni Erooho Yoowaarya,
Ni owerya wa muteko waahirwa;
Vano ethhu Owo aawiirenl'y'awe nihiku nle
Owo onoowiirelani,
Kinnithapa ohimyaka wira ka mmosa a
yaawo.

Miyo ka mmosa a yaawo, ka mmosa a yaawo,
Kinnithapa ohimyaka wira ka mmosa a
yaawo; (Aleluya!)

Mmosa a yaawo, mmosa a yaawo,
Kinnithapa ohimyaka wira ka mmosa a
yaawo.

²⁵⁵ Nwiriyane, kookhalana mutthaka mwaamukhaani wa nyuwo:

Murwe, munn'aka, mphwanye eparakha yeela
Enrowa orapiha murim'anyu wa etampi,
Enrowa opacerya orumiha ittiwi soohakalaliha
Ni okhaliha munep'anyu ovihiwaka;
Oh, eyo enooviha vano mmurimani mwaka,
Oh, nivuwihiwe nsina Nawe,
Kinnithapa ohimyaka wira ka mmosa a
yaawo.

²⁵⁶ Khamutteeliwe murima nyuwo okhala mmosa a yaawo? Exeeni iyo? Eyo Erooho enuupulula. Owo muupululo wa Muluku, “Vamwala va.” Miyo khenikicala sinto pixipu muulupale...

²⁵⁷ Namukuttho muKatolika aahikilaathi, kahi khalayi, owannyaka. Nto owo khwira, “Mwenye Branham, miyo kirweenle wookohani yookoha.”

Miyo khwira, “Vaareera, mulopwana.”

²⁵⁸ Khwira, “Kookhalana ewarakha va ya pixipu, wa nyuwo.”

Miyo khwira, “Vaareera, mulopwana.”

²⁵⁹ Owo khwira, “Moolumo munihimyaanyu, nyuwo munoovenxa ntata nanyu ni olapha wira munrowa paahi ohimya ekekhai?”

²⁶⁰ Miyo khwira, “Nkinrowa.” Miyo khwira, “Bibilia ohimmye wira, ‘Muhilaphele ethu, hata wirimu nnakhala elapo ya vathi (okhala wira ntthatto na inawu Sawe). Aayo anyu ekhaleke nnari ni ayo.’ Vakhala wira pixipu onthuna wiwa ethu erin’aka ohimya, owo onookuxa nuulumo naka wa yeeyo. Owo aahiire, miyo nkinlapha.”

²⁶¹ Namukuttho ola mwaamukhaani va ekereja Murima Woowaarya, owo khwira, “Nyuwo moompatisa Pauline Frazier wookumanani *khata ni khata?*”

²⁶² Miyo khwira, “Miyo kihira, mulopwana, ohitto oMuro Ohio.”

²⁶³ Khwira, “Mumpatinse sayi?”

²⁶⁴ Miyo khwira, “Miyo kimpatinse kimpwinihaka vathi mmaasini ni Nsina na Pwiya Yesu Kristu.”

²⁶⁵ Owo khulepa. Khwira, “Nyuwo moosuwela, ekereja Katolika yaanipatisaka siiso.”

Miyo khwira, “Liini?”

Owo khwira, “Okathi woopacerya.”

Miyo khwira, “Okathi xeeni woopacerya?”

Owo khwira, “Ahe, wopaceryani.”

Miyo khwira, “Wopaceryani xeeni?”

Owo khwira, “mBibiliani.”

Miyo khwira, “Munihimya wira kha-...mwa—mwa awiixutti?”

Owo khwira, “Vekekhai.”

Miyo khwira, “Nyuwo muniwihana aKatolika, wala, e—e...? Nyuwo munihimya wira awiixutti yaari aKatolika?”

Owo khwira, “Vekekhai, ti yaaryaaya.”

Miyo khwira, “Miyo koona wira ekereja Katolika khiyarukunuwa?”

Owo khwira, "Khenrukunuwa."

²⁶⁶ Miyo khwira, "Vano mwaha wa xeeni Petru wira, 'Murukunxe murima, mpatisiwe ni Nsina na Yesu Kristu'? Nto nyuwo munihimya wira aari... owo aari paapa?"

²⁶⁷ "Ayo."

²⁶⁸ "Vano xeeni nyuwo opatisaka ni nsina na 'Tithi, Mwaana ni Erooho Yoowaarya'? Ni owo aanipwiniha, nto nyuwo munooyeeherya. Vano exeeeni ekhumelenle?"

²⁶⁹ Owo khwira, "Masi, moone," khwira, "ekereja Katolika yookhalana owerya wo wira etthu p'itthu entthun'aya wira." Huh.

²⁷⁰ Miyo khwira, "Nto nyuwo nwiihanne awiixutti aKatolika?"

²⁷¹ Owo khwira, "Ayo."

²⁷² Miyo khwira, "Mwenye, kihaana Josephus, kihaana *Eliivuru ya Alipa Oowiwelawa waamini ya Fox*, kihaana *Wakathi Woopacerya*, ya Pemberman, kihaana *aPapilooniya Aili* ya Hislop, awahala a khalayixa akhanle mulaponi, mukoonihe mmo nipo ekereja Katolika etonko aya orummwa wala ephiyenryaaya okhala mutthenkeso... miyaakha imiya thanu na mosa numala okhala murummwa ookiserya."

"Oh," owo khwira, "hiyo ninaamini ele ekereja enihimy'aya."

Miyo khwira, "Miyo kinaamini ele Bibilia enihimy'awe." Munnona?

"Vano," owo khwira, "Muluku ori mukereja mw'Awe."

²⁷³ Miyo khwira, "Muluku ori mwa Masu Awe." Nto miyo khwira, "Vakhala..." Owo khwira... Miyo khwira, "Bibilia khonihihya wira Muluku ori mukereja mw'Awe, masi Bibilia onihimya wira Muluku ori mwa Masu Awe. 'Wopaceryani naari Nsu, nto Nsu naari ni Muluku, ni Nsu naari Muluku; khukhala ni hiyo.'" Ti yeeyo. Miyo khwira, "Muluku ori mwa Masu Awe."

²⁷⁴ Owo khukhuma khuhimya yeeyo. Owo khwira, "Ahe, hiyo nihivaanyihaneke," khwira, "okhala wira nyuwo munimwaamini Bibilia, miyo kinaamini ekereja."

²⁷⁵ Miyo khwira, "Miyo kinaamini wira Bibilia ti Masu a Muluku oowuupuxeriwa ni kхиivo hata evirikanyelo mwa Yaawo. Ni Awo Masu a Muluku, ithokiheryo Sawe Soohimala wa okathi wothene onoorwa. Owo ohimmye wira, 'Erimu n'ilapo ya vathi sinoovira masi Masu Aka khanvira.' Ti yeeyo. Miyo kinaamini Masu."

²⁷⁶ Owo khikhuma khurowa wa Muhano Frazier. Owo khwira, "Muhano Frazier, munooolepa vapapheloni va wira mwan'inyu mwaaruusi pooti okhala mempuru a ekereja Katolika?"

²⁷⁷ Owo khwira, "Kaamwamputi omuroiha mmahiye."

²⁷⁸ Khwira, "Wuuliha muru." Khwira, "Nyuwo mwaahaana oxukhuru wira mwaaruusi uwo onookhuma mweethiruni mmwe, orwe mukereja Katolika."

²⁷⁹ Khwira, "Ankhi aari mwaaruusi anyu orwaaka mukereja mwaka, mwaarowa ohimya exeeni?"

²⁸⁰ "Oh," owo khwira, "eyo ti yoovirikana."

²⁸¹ Khwira, "Nnari, kehiyo." Owo aahisuwela wira aahikhala nipuro nlo okathi okhummyaawe wa mwamuthiyan'ole vale. Owo aahisuwela wira aari nipuro nlo. Owo khwira, "Vano, mukhora ole vale ti woohuliwa yoowo nvolonwaanyu."

²⁸² Moone, eyo p'inamuna. Muhihiyererye munyakeliwaka, khivantthuneya nyuwo onyakeliwa. Vakhala wira Muluku ori ni nyuwo, taani onwerya woovirikanyani? Ekeekhai! Mulattu ene olelo, murina nikhuva na ekuuku ohiya muthana. Mmweemererye Muluku ni ekeekhai!

²⁸³ Erooho Yoowaarya emosaru yaakhuruwenle arummwa ale ni mwa evirelo ya okathi, nlelo eri Mukereja Mwawe olelo, ale Muluku aaisupulunly'awe Mmansawe wa yaawo. "Kahi ole ontthuna, wala ole ontthyawa, masi Muluku onimoriwa ikharari." Ti Muluku, mwaha w'othanla Wawe, onaaruuhu athtu ni waatthukula maitho aya. Nyuwo khimwaakhalakhala nweryaka woona Eyo, nyuwo khamunoona, ni khimwaakhalakhala nweryaka woona vahikhanle wira Muluku onootthukula maiwelo anyu. Bibilia ohimmye wira nyuwo mwa oochoona, ni khimunwerya woona. Khivantthuneya nyuwo weehererya. Ni olakeya wothene, isomelo mwaakhanlyaanyu okhalanaka, munkhala ootepa ohoona voohihiyererya.

²⁸⁴ Vano, nyuwo Ekereja ya Kristu va, nyuwo "munlavula vaavo Bibilia vanlavule-awe, ni munimaala vaavo owo onimaala-awe," ankhi Yeela? Khimureere omaala wa Yeeyo. Vekeekhai.

²⁸⁵ Moone, entthuneya Ekeekhai ya muroohni yowuupululiwa. Vano Muluku onookhuruwa khwiisoniherya Mmansawe ni olipiherya wira Eyo Ekeekhaiii. Amen! Nyuwo munnimphenta Yoowo? Ni miyo. Amen.

²⁸⁶ Vaareera, nyuwo aMetotista othene munnitthuna ovahana matata ni aPatista vano? Nyuwo maPrespiteriyaano?

²⁸⁷ "Vano," nyuwo muniira, "Munna Branham, nyuwo khamunipatthana ni aPatista ni maPrespiteriyaano ale ahinip...?"

²⁸⁸ Nnari, mulopwana, nkiniira. Kinaatthokelela okhala axinn'aka. Vekeekhai! Nkincala vakhala wira khimpatisiwe nnakhala, mwaapatisiwe-ene ni nsina na "Ethutu ya Saroni, Ekhokowa ya Mukhatoni, ni Ethheneeri y'Oxaka," eyo khiyaarowa okhalana...eyo yaarowa okhala yookupaleyaa ntoko "Tithi, Mwaana, Erooho Yoowaarya." Itiitulu tthaaru

paahi. Owo aari Ethutu ya Saroni. Ti siiso? Ekhokowa ya Mukhatoni, Ettheneeri y’Oxaka, sothene iyo. Vekeekhai, Owo aari seiyo. Etthu emosa paahi wala ekina. Masi va t’ile ekhanle: enamuna yoolikana ya Yoolempwa ti ni Nsina na Yesu Kristu. Nyuwo mwatthuna enamuna ya Soolempwa, eyo t’elikanne. Eyo t’inamuna yoolikana.

²⁸⁹ Vano, nyuwo mwapatisiwa ni nsina “n’Atithi, Mwaana, ni Erooho Yoowaarya,” khunoona ntoko eri saana, amen. Moona wira ti waakhula wooreerela wa Muluku wa muupuwelo wooreerela wa Muluku, amen. Mukeleleke oholo, moone.

²⁹⁰ Masi vanikaasa miyo, vanaasiwa mpantte aka, vaakhanle wira mwaamukikoha, wira, “Munna Branham, kaahaana opatisiwa-tho?” Kaamwiira, “Ayo,” wa mpantte aka.

²⁹¹ Mwaamuthiyana mmosa aahirwa va nihiku nlo, khwira, “Apwiya aakihana wira kikhale mulaleyi.” Miyo nkaaminni iyo, siiso kihinaamini aka wira—wira owo aamuwerya otuphela vasulu va mweeri. Ni owo . . .

²⁹² Miyo khwira, “Ahe, ti yooreera saana, munna.” Miyo khwira, “Mootheliwa?”

“Ayo.”

“Murina anamwane aili?”

“Ayo.”

Miyo khwira, “Exeeni . . . ? Aiyanyu ahoopowa?”

“Nnari.”

Miyo khwira, “Munrowa owiiriha exeeni?”

“Kinrowa waahiya owaani.”

²⁹³ Miyo khwira, “Eyo ecampo yooreerela xetwani otonko awe okhalana. Nyuwo mwa muthiyana ooreera opacerya wene, vano munakhumela nno opuwani, munoonakhala ecampo ni yooluluwanya wa xetwani. Ni aiyanyu, owaani, mmiravo, vano nyuwo waahiya ni aana awo aili; awo anoopacerya weetta ni muthiyana mukina, n’anamwane ala anoorowa okhalana tiithi mukina mahiku awo.” Miyo khwira, “Yoopacerya, vakhala wira Muluku oomwiitthana muthiyana, Owo oovirikanya Masu Awe.” Miyo khwira, “Vano, nyuwo mwatthuna wira, vaareera.” Miyo khwira, “Vano, olamula sa mmurimani, munihimya wira Apwiya ahoovahani olamula sa mmurimani. Munthuna murowe, vaplatafroma, mweehererye?”

²⁹⁴ Owo khwira, “Ayo.” Nto nyuwo muhoona etthu ekhumelenle.

²⁹⁵ Moone, iwo oviheriwa. Ehaana orwa mwa Masu. Yaahikhale muhina mwa Masu, weeso khelikanne. Nkincala ele ekhanle wuukhuwa wanyu, khelikanne. Amen! Eyo enniweya saana. Amen!

²⁹⁶ Vaareera:

Ninrowa weetta moWaaryani, Waarya
wooreera,
Murwe vaavo okame wa omoreliwa ikhari
onaaryaaya;
Onaarya mwa hiyo othana ni ohiyu,
Yesu, Waarya wa mulaponi.
Nyuko masantu a moWaaryani mulaleye,
Yesu, Waarya wa mulaponi;
Nto ittiwi sa Wirimu sinooruma,
Yesu, Waarya wa mulaponi.
Ninrowa weetta mowaaryani, waarya
wooreera,
Murwe vaavo okame...
Onaarya mwa hiyo othana ni ohiyu,
Yesu, Waarya wa... .

²⁹⁷ Vano kintthuna wira khula mmosa orukunuwe ovahane matata, n'ale yoorukurenryeni, ni atthu othene vano, niipaka-tho:

Ninrowa weetta moWaaryani, Waarya
wooreera, (Amen!)
Murwe vaavo okame wa omoreliwa ikhari
onaaryaaya;
Onaarya mwa hiyo othana ni ohiyu,
Yesu, Waarya wa... .

²⁹⁸ Nyuko munnaaphenta aMetotista? Mwiire, "Amen."
[Muthukumano oniira, "Amen."—Mol.] aPatista?
aPrespiteriyaano? aKatolika? E...oh, nyuko munnaaphenta
othene aya? Mwiire, "Amen." ["Amen."]

Ninrowa weetta moWaaryani, wooreera... .

Nivahanaka matata, okathi oniipaahu.

Oh, murwe vaavo okame wa omoreliwa
ikhari onaaryaaya;
Onaarya mwa hiyo othana ni ohiyu,
Yesu, Waarya wa... .

²⁹⁹ Nihinatthi wiipa nsipo nahu n'olaxeryana...Vano,
vanooweryaneya miyo okhala-tho vaava Ttiminku. Vano,
numala yeeyo nkintthika-tho mpakha Natale. Moone,
okhala wira kinrowa oMichigan, okhuma oMichigan kinrowa
oColorado, okhuma oColorado kinrowa oIdaho, okhuma oIdaho
kinrowa oCalifornia, nto ninoothika. Ni vaaweryaneyaka
(kintthuna wira mukivekelele) kinrowa okhala oWaterloo, Iowa,
opacerya Janeiro mahiku yeettaka miloko miili ni maxexe
mpakha Fevereiro mahiku yeetteka maili. Moone, areena ole
muulupale iwe, kinoomalaru olicareliwa okathi vakhani ovinre,
ni kihaana okhuma vano mpakha Ttiminku wira kivekele.
Moone, oWaterloo, Iowa, yeeyo enkhuveela vano.

³⁰⁰ Masi vano, muupuwele, nwiriyane elaleeryo ya muraatiyuni ya munna ewoora ya neethanu na xexe, Saapatu voosiisu. Ninoomwiihana nimuhimeerye. Nto eyo enrowa okhala mu WLRP, nikhuru n'axexe Neville ewoora yaneethanu naxexe, Saapatu voosiisu. Hiyo nno... Miyo—miyo kaahiphinyere omaliha, Munna Neville onoomaliha sookoha. Munimwiira, Munna Neville, Ttiminku voosiisu? [Munna Neville onootheya ni wira, “Orummwa wuulupale!”—Mol.] Ahe, nwehe, nyuwo mwakhalana mukacamiho, miyo kinootthimaka ni nyuwo. Owo onooweha. Vaareera.

³⁰¹ Vaareera:

Mukuxe Nsina na Yesu ni nyuwo,
Anamwane a mixankiho ni ooriipiwa murima;
Nlo nnimoovahani otthapa ni olipa,
Oh, mukuxe Nenlo mapuro othene
onrow'anyu.

Nsina nooreerexa, O noosivela!
Muroromelo wa mulaponi ni ohakalala wa
Wirimu;
Nsina nooreerexa, (Nsina nooreerexa!) O
noosivela! (Noosivela!)
Muroromelo wa mulaponi ni ohakalala wa
Wirimu.

³⁰² Vano, mwaatthunaka omusuwela muPatista onaamini okhuwela, eyo p'inamuna y'okhuwela miyo kinaamini aka. Mai ule mutokweene okilanthe vale, nto okathi Erooho yamukhuruwenle-aya. Owo khupacerya okhuwela, khaawerya ovarelala, aaroorowa ottuli khumpatikha mwan'awe mwamuthiyana. Eyo ti enamuna enikisivela woona. Amen. Owo ti moonelo, w'ekkekhai wa khalayi, onikhuma mmurimani wa exariya. Oh, wulu, a khalayi—santu, a khalayi, oottokottha, oolikana wira orowe owaani Movuwani. Olipelelaka wiihaniwa paahi, moone, ovirihaka okathi wooreera paahi.

Vaareera, Munna Neville vano, entthunaawe wira. 

57-0925 Sookoha ni Soowaakhula aHeperi Mpantte I
Branham Tabernacle
Jeffersonville, Indiana wAmerika

EMAKHUWA

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinvwa ethu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanel, xontte mulavule ni:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org